

四庫全書

史部

欽定四庫全書

史部

陝西通志卷九十八

詳校官監察御史_臣劉湄

檢討_臣德生覆勘

總校官降調編修_臣倉聖脉

校對官中書_臣湯垣

謄錄監生_臣李永寧

欽定四庫全書

陝西通志卷九十八

拾遺一

博古

風雅

閒適

語林

丘索義例麗土則書羣分類聚採掇靡餘天府地肺
漢唐故區搜神洞冥亡是子虛可喜可愕捫闔紛拏
侯鯖狐腋雜佩瓊琚廣蒐六籍恣我獵漁或資談塵
或佐記珠作拾遺志第三十二

博古

陽虛山石刻二十八字係倉頡遺筆按倉頡古字刻陽
虛山石室李斯止識八字曰上帝垂命皇辟迭王其餘

二十字斯不能識

商州志 按陽
虛山在雒南縣

倉頡冢碑大篆書在左馮翊利陽亭南道旁

聞人牟準
衛顗碑文

漢宣帝擊盤石於上郡陷石室中得一人裸而被髮反
縛械一手足以問羣臣莫能知劉向曰此貳負之臣也
昔貳負殺竊竊帝梏於疏屬之山帝問所出曰見山海

經野客
叢談

苻堅太元七年新平郡獻玉器初堅即位新平人王彫
上書曰新平古顓頊之墟里名曰雞間記云此里應出
帝王寶器其曰延壽寶鼎至是新平人得之以獻

晉書
苻堅

載
記

扶風田者見河岸土崩鑿之得一銅器狀如盂高八寸
圍徑六寸乳周其體中有古文莫能辨識醫師席姓出
千錢易之徧詢博古家曰此殷之乳彛也古文為祖丁

二字

觚
賸

政和間李朝孺為陝西轉運遣人於鳳翔府破商比干墓得銅盤徑二尺餘中有款識二十六字

墨莊漫錄按何比干係

漢平陵人此或何墓云商者誤

毛伯敦銘皇祐中長安民得於渭上銘曰毛伯內門立中庭右祝邠王呼內史冊命邠王曰邠昔先王既命汝作邑今惟亂商乃命錫

廣川書跋

史記武王克商毛叔鄭奉

明水銘謂鄭者毛叔鄭也伯者爵也敦乃武王時器

六一

題跋

歐文忠曰十鼓之文可見者四百六十五字不可識者過半即韓歌所謂牧童敲火牛礪角年深豈免有闕訛者也其可曉者有曰我車既攻我馬既同者車攻語也有曰其魚維何維魴及鯉何以標之惟楊及柳則兼記田漁也凡數語可讀者蘇文忠所謂衆星錯落僅名斗者也

雍錄

右石鼓文周宣王之獵碣也唐自貞觀以來蘇

勗李嗣真張懷瓘竇泉竇蒙徐浩咸以為史籀筆蹟虞世南歐陽詢褚遂良皆有墨妙之稱杜甫八分小篆歌

叙歷代書亦廁之倉頡李斯之間其後韋應物韓愈稱述為尤該至歐陽修作集古錄始設三疑以韋韓之說為無所考據後人因其疑而增廣之岐陽石古文有謂為周宣王獵碣者惟董程二氏以左傳成有岐陽之蒐證之皆鑿鑿有據其畧云考之書天子大蒐會諸侯施命令非常事也史不得無書若宣王蒐岐即周史失之列國不得並逸胡後世無聞焉則為成王信矣

郭宗昌周岐陽

石鼓文跋

又鼓有十因其石之自然粗有鼓形字刻於其旁

石質堅頑類今人為碓磳者其初散在陳倉野中韓吏部為博士時請於祭酒欲以數索馳輿致太學不從鄭餘慶始遷之鳳翔孔子廟五代之亂又復散失司馬池知鳳翔復輦至於府學而亡其一皇祐四年向傳師搜訪而足之

王厚之跋岐陽石鼓文後

張仲器嘉祐中原父在長安獲二古器於藍田形制皆同有益而上下有銘詩曰張仲孝友蓋周宣王時人也

六一題跋

商雒鼎銘原父得之終南上雒其銘云惟十有四月既死霸王在下都雒公誠作樽鼎用追享丁於皇目考用氣縻壽萬年無疆子子孫孫永寶用雒公不知為何人原父謂古丁寧通用蔡君謨謂十有四月者何原父亦不能言也

六一題跋按十有四月既元句

伯牙山州東百里俗呼白鴉山嘗於風起雲來時隱隱聞絲絃聲覓之不得崇禎初好事者陟其巔得斷碣於敗葉中鐫伯牙二字大如斗意牙嘗游觀至止故琴韻

鏗然迄今未絕

商州志

李保季得鼎於長安耕者其銘曰集作尊鼎萬壽無疆

子子孫孫永實用康

廣川書跋

終南古敦銘蘇軾為鳳翔府判官得古器於終南山下其形制與今三禮圖所畫及人家所藏古敦皆不同其

銘有寶尊敦之文遂以為敦耳

六一題跋

旅匱銘此器類觚但容受勝耳昔人得於萬年涸中

廣川

書跋

劉原父既得鼎韓城遺余以其銘而太嘗博士楊南仲能讀古文篆籀為余以今文寫之而闕其疑者原父在長安所得古奇器物數十種亦自為先秦古器記為余釋其銘以今文而與南仲時有不同故並著二家所解以俟博識君子

六一題跋

太宗時長安民耕地得甌初無識者其狀下為鼎三足上為方甌中設銅簞可以開閣製作甚精有銘在其側學士句中正工於篆籀能識其文曰甌也遂藏於秘閣

六一
題跋

鬻簋銘曰叔高父作鬻簋其萬年子子孫孫永寶用原
父在長安得此簋於扶風簋容四升其形外方內圓而
小脣之似龜有首有尾有足有甲有腹今禮家作簋亦
外方內圓而其形如桶但於其蓋刻為龜形與原父所
得真古簋不同

六一題跋

按廣川書跋云先秦古器有鬻簋或曰以火亨鬻也考其文當為

旅古有八簋旅
陳於席謂之旅

龔伯尊彝臨江劉原父得於長安制形類敦而大其重

若干其容若干附耳為奇獸口圜上周以回文下畫為

雲氣以禮考之壘也

廣川書跋

潞國文公守京兆得鼎其銘曰惟正月初吉丁亥王子

吳擇其吉金自作歆酈其縻壽無疆子子孫孫永寶用

之

廣川書跋

宣帝時美陽得鼎獻之中有刻書曰王命尸臣官此枸

邑

尸主事之臣
枸邑即邠地

賜爾旂鸞黼黻珣戈尸臣拜手稽首曰

敢對揚天子丕顯休命此鼎所以褒賜大臣大臣子孫

刻銘其先功藏之宮廟也

冊府元龜

秦武公作羽陽宮在寶雞縣界元祐六年正月直縣門之東百步居民權氏濬地得古簞銅瓦五皆破一獨完面徑四寸四分面隱起四字曰羽陽千歲篆字

渢水燕談錄

詛楚文有三告巫咸文在鳳翔東坡鳳翔八觀詩嘗紀其事舊在府廨徵歸御府述秦穆公與楚成王相好及熊相倍十八世詛盟之罪以史記世家年表考之秦自穆公十八世至惠文王與楚懷王同時此詛為懷王也

王厚之書
詛楚文後

秦昭和鐘銘慶厯中葉清臣守長安所得上之大樂攷
之音中大呂銘云不顯朕皇祖奄有下國十有二公自
非子至成公十有二世是鐘為成公作

東觀
餘論

秦始皇得藍田玉製為璽八面正方螭紐命李斯篆文
以魚鳥刻之其文曰受天之命皇帝壽昌或曰受命于

天既壽永昌

賈志

秦傳國璽以藍田水蒼玉為之取水德

魚蟲鶴螭蛟龍皆水族物大畧取此義以扶水德

書史

隋開皇二年長安人穿地得金版有銘云始皇時量器

白孔
六帖

秦度量銘二按顏氏家訓隋開皇二年之推見長安官
庫中所藏秦鐵稱權傍有鐫銘二載之家訓文同嘗遊
長安買得二物其上刻二銘其一銅鍰上有銘循環刻
之乃前一銘也其銅方版可三四寸許所刻乃後一銘
也與家訓所載正同余意秦時茲二銘刻於器物者非

一也

六一
題跋

秦始皇二十一年長狄十二見於臨洮長五丈餘以為
善祥鑄金人十二以象之各重二十四萬斤坐之宮門
之前謂之金狄皆銘其胸云皇帝二十六年初兼天下
以為郡縣正法律同度量大人來見臨洮身長五丈足
六尺李斯書也故衛恒叙篆曰秦之李斯號為工篆諸
山及銅人銘皆斯書也漢自阿房徙之未央前俗謂之
翁仲矣地皇二年王莽夢銅人立惡之念銅人銘有皇
帝初兼天下文使尚方工鑄滅所夢銅人膺文後董卓

毀其九為錢其在者三魏明帝欲徙之洛陽重不可勝
至霸水西停之漢晉春秋或言金狄泣故留之石虎取
置鄴宮苻堅又徙之長安毀其二為錢其一未至苻堅
亂百姓推置陝北河中

水經注

趙龍圖師民自耀過同說殺祠廟疑殺祠亦是一兵器
其秦禱兵之所乎

江隣幾
雜志

瓦作楚字者秦瓦也秦作六國宮室用其國號以別之
長安志

商人堦中得敦銘曰秦公作敦其制簋也

廣川書跋

咸陽志曰泰山碑秦相李斯書跡妙時古為世所重鄭文寶模刊石於長安故都國子學今在文廟石皆剝落

唯二世詔一面稍見

學古編

漢中府治月臺東南隅有璞石如鼓而方高二尺六寸圍八尺脰間作四獸面有割露痕審視之真碧玉也制

似壘相傳楚漢間物

隴蜀餘聞

興平古廢丘地項羽封章邯為雍王都此萬厯四十三

年土人於地中得一金印龜紐方寸許文曰雍王章邯

印隴蜀
餘聞

長安中有耕者得陶器於古墓中形如卧甕口與足出

甕腹之上下其色黝黑光潤如玉呼為甕瓶大者容數

斗小者僅容數合養花成實或云三代秦以前物

癸辛
離識

四皓沒惠帝為之製文立碑而四皓碑目獨見於任昉

文章緣起故特表出之

天祿
識餘

劉原父在長安有獲玉印遺之者其文曰周惡夫印公

曰此漢侯印尚存於今耶古亞惡通用史記盧綰之孫
他人封亞谷侯漢書作惡谷是矣

避暑
錄話

致和中仕關中於同官蒲氏見漢印文云輯濯丞印文
奇古非隸非篆輯讀如楫濯讀如濯蓋船官也上林有
船官楫濯有令丞此蓋丞官也

子嬾真

漢郊祀志武帝甘泉作益壽延壽館太史公作益延壽
觀近歲雍耀間耕夫有得古瓦其首作益延壽三字瓦
徑尺字書奇古即此觀當時瓦也

東觀
餘論

漢瓦形製古妙瓦頭皆古篆盤屈隱起其文有長樂未央

長生無極漢並天下萬壽無疆上林儲胥等字

淳化志

漢武帝幸甘泉坂馳道有蟲蟠而覆地赤如生肝頭目
悉具東方朔曰蟲名怪哉憤氣之所生也此必秦故獄
處上曰何以去之朔對曰凡積憂者得酒而解以酒灌

之當消於是取蟲置酒中須臾麋爛

東方朔傳

漢武帝鑿昆明池極深悉是灰墨以問東方朔朔曰可
試問西域胡後漢時有憶朔言者乃以灰墨問之胡人

云天地大劫將盡則劫燒此劫燒之餘摯虞決
疑要注

昭帝始元元年於藍田覆車山鑄一鼎高三尺受五斗
刻其文曰宜君王和四方調滋味去腥傷小篆書三足

古今刀
劍錄

前漢谷口銅甬劉原父在長安時得之其前銘云谷口
銅甬容十斗其下減兩字始元四年左馮翊造其後銘
云谷口銅甬容十斗重四十斤甘露元年十月計掾章
平左馮翊府下減一字原父以今權量校之容三斗重

十五斤

六一題跋

宋宇文伯修藏一古鼎款識曰輦酌宮

香祖筆記

蓮勺宮博

山爐下槃銘一漢五鳳中造宣帝本紀云困於蓮勺鹵

中注云縣也不云有宮蓋秦漢離宮不可勝數史不能

備載也

六一題跋

宣帝甘露元年於華山仙掌鑄一鼎高五尺受四斗擬
承甘露刻其文曰萬國伏貽長久鑄神鼎承天酒三足
小篆書又建章宮銅人生毛以為美祥作一金鼎埋之

本宮

古今刀劍錄

紹聖初先人官長安於漢高祖廟前民家得一白玉奩高尺餘遍刻雲氣龍鳳蓋為海中神山足為饗饗實三

代寶器

邵博聞見後錄

宣和五年余來關中與田仲方會長安因示余龍栢考其制有龍首其旁刻飾雜有花草蟲獸足分類卮其識曰互卷考之古字當讀為亞鎗漢制東宮給龍頭鎗則

此器也其曰亞者亦非一當有序而陳者

廣川書跋

漢西都時南宮寢殿內有醇儒王史威長葬銘曰明明
哲士知存知亡崇隴原薈非寧非康不封不樹作靈乘
光厥銘何依王史威長

晉張華
博物志

僕於關中王慈君求家見一古物似玉正如中指上有
四字乃正月剛卯也漢人以正月卯日作佩之與陳湯
所謂強漢者同義

嬾真
子

予於關中得一銅匱其背有刻文二十字曰律人衡蘭
注水匱容一斗始建國元年一月癸卯造皆小篆律人

當是官名

沈括筆談

辛繕隱居華陰光武徵不至有大鳥高五尺五色備而多青棲繕槐樹旬時不去弘農太守以聞詔問百僚太史令蔡衡對曰凡象鳳者有五多赤色者鳳多青色者鸞多黃色者鳳多紫色者鸞多白色者鵠此鳥多青乃鸞也上善其言

鴻書

潼關西道北行有楊震碑

通典

漢郃陽令曹全碑萬歷初郃陽舊城掘得此碑中平二

年造碑文隸書道古不減卒史韓勅等碑無一字缺壞

石墨
鵠華

曹全碑修孔廟時欲移置於至聖殿前碑屹然不

可動人以為神故仍立於外又有十三字漢碑亦於夏

陽故址掘得者蓋斷碣僅十三字耳亦八分書弗可句

讀筆畫古勁過於曹碑康熙七年署縣事郭丞得之識

為漢物砌之曹全碑傍余訪求之不知何往僅見其墨

搨云

宰莘退
食錄

張昶八分碑在華陰今華山所存漢碑凡四

懷瓘
書斷

鄭縣城南山北有五部神廟東南向華岳廟前有碑後

漢光和四年鄭縣令河東裴畢字君先立

水經注

漢西岳華山廟碑漢魏碑例不著書刻人姓名獨此題

郭香察書洪适隸釋云東漢循王莽禁無雙名郭香察

書者察蒞他人之書又唐徐浩古迹記以為蔡中郎書

按碑文云京兆尹勅監都水掾霸陵杜遷市石遣書佐

香察書但書雖道勁殊不類中郎且市石察書皆著其

名而獨無中郎名不可曉

石墨鐫華

政和初人於陝西發地得木竹簡一瓮皆漢世討羗戎
馳檄文書若今吏案行遣皆草書然斷續不綴屬惟鄧

騭永初二年六月一篇成文爾

東觀
餘論

漢李翕析里橋邨閣銘在略陽相傳為蔡邕書碑文醅
散闕之潮潔徙朝陽之平爇歐陽公以為疑楊用修謂
醅古與釋通潔借作濕爇與燥同解作去濕就燥之義
又碑中太守李君諱翕字伯都今版本皆作李會唯鄭

樵畧曰李翕與碑合

石墨
鐫華

華山下有漢魏文帝廟廟有石闕數碑一碑是建安中立漢鎮遠將軍段熲更修祠堂碑文漢給事黃門侍郎張杲造杲自書之元帝又刊其二十餘字二書存重名傳於海內

水經注

司馬子長廟前有碑永嘉四年漢陽太守殷濟瞻仰遺文大其功德遂建石室立碑樹柏

水經注

蔡邕鐫刻七經著於石碑兵火既遭碑亦損缺隋開皇六年自鄴京載入長安置於秘書內省議欲補緝立於

國學會亂遂廢營造之司用為柱礎貞觀初魏徵始收

聚之十不一存

廣川書跋

河東李員居長安延壽里元和初室西隅有微聲鏗然
俄有吟歌者云色分藍葉青聲比磬中鳴七月初七夜
吾當示汝形至秋六日夜雨墮堂北垣明日得一缶僅
尺餘製用金形狀奇古隱然有文皆小篆書乃崔子玉
古磬銘也

宣室志

漢水東逕胡城南義熙十五年城上有密雲細雨五色昭

章人謂之慶雲休符當出雲霄乃覺城崩半許淪水出

銅鐘十二枚刺史索邈送洛陽歸宋府

水經注

笋殿側有魏溫泉堂碑其石瑩徹見人形影號頗黎碑

長安志

興平一道觀中有星隕石如半柱滿其上皆繫痕豈果

繫於空中邪旁有石記西晉時隕

聞見後錄

雷煥得豐城劍張華以華陰赤土送煥拔劍倍益精明

續博物志

劉原父在長安有得古鐵刀以獻製作極巧下為大環以纏龍為之而其首類鳥人莫有識者原父曰此赫連勃勃所鑄龍雀刀也問之乃种世衡築青澗城掘地所得正夏故疆也

避暑錄語

後魏豆盧恩碑在咸陽恩墓前隸書令尹王公家瑞求得之予摹一紙多不堪讀而王公所刻金石遺文尚存強半蓋從碑下錄之耳

石墨
鐫華

後魏周惠達碑視豆盧碑稍完隸書碑首大魏故司空

匡穆周公之碑銘篆書十二字宛然如新按史傳與碑畧同碑具當時贈謚而史無之史但云開皇初追贈蕭

國公云

石墨
鐫華

隋安喜公李使君碑奉天鄉人掘得此碑樹之上官村廟前隸書亦自道逸而碑頗完海陵公賀若誼碑正書方整精健在興平縣文廟宋人磨其陰刻夫子廟記而此文止存十三一縣令苦貴人募搨使捶去之常醜奴墓志醜奴始平人為都督榮澤令大業元年卒志在興

平崇寧寺為童子摩娑幾平智永真草千字文大觀間刻皇甫誕碑于志寧撰歐陽詢書俱在西安府學李淵為子世民祈疾疏在鄠縣草堂寺

石墨
鐫華

大業四年藍田令王曇於藍田山得一玉人長三尺四寸著大領衣冠幘詔問羣臣莫有識者崔頤答曰謹按漢文以前未有冠幘即是文帝以來所制作也嵩高山廟記云有神人以玉為形像長數寸或出或隱出則令

世延長

隋書崔
廓傳

貞觀元年太宗命閭立本圖寫功臣二十四人於凌烟閣御製贊詞令褚遂良書焉宋游師雄得其本於蒲華間行部過九成宮見遺石頗多遂命邑令閭上功刻於縣庠今舊刻止存七人

麟遊縣志

唐太宗蘭亭用玉石刻之文宗朝舒元興作牡丹賦刻之碑陰熙寧間薛紹彭聞公厨有石用以鎮肉取視之乃刻牡丹賦於碑陰者遂易之以歸長安大觀中詔取

置宣和殿

續文獻通考

太宗英文德后御製刻石文并六馬像贊皆立陵後歐陽詢書高宗又詔殷仲容別題馬贊於石座此宋游景叔所題云得之唐陵園記者是也景叔云詢書不復見獨殷書存余兩度觀之西第一四蹄端立有馬圍撫膺拔箭人馬相如鼻語東第一西第二則三蹄立而前左一足作跑勢如索水草有嘶聲餘三絕塵而奔香鬃錦帶飄飄怒起猶想見其籊雲掣電時也其石高可四尺馬軀可三尺雖半刻而稜稜露骨西第三石已仆五馬

亦多斷裂然氣不彫喪趙子函乃疑非唐時物謬矣

昭陵

志

駿石居後殿左右下一坎兩行列數石人皆不全此貞觀中擒服諸番君長頡利等十四人之像琢石列之北司馬門內兩旁有土阜中為甬路遺跡可尋陵圖所云六駿馬刻石於北闕下即此地蓋九峻三面峭削惟正北稍平行故表闕刻石俱置於此

昭陵志

余經行墓雖纍纍然或土存石缺或石存畫缺如長孫

無忌墓文俱失

在劉洞西村

徒存無字碑高士廉碑字稍存

墓亦烏有即文皇后碑止有龜趺卧側耳余徧求之獲
二十一碑於房玄齡得五百餘字褚遂良書高士廉得
三百餘字許敬宗撰趙模書段志玄得八百餘字張引
蘭陵公主馬周各得六百餘字公主碑李義甫撰馬碑
許敬宗撰殷仲容分書姜遐許洛仁各得九百餘字姜
碑侄郎公晞撰書孔穎達字及千于志寧撰阿史那忠
崔敦禮各得字七百餘崔碑于志寧撰于立政書豆盧

寬字止四百李義甫撰然四碑點畫多殘餘薛收張阿
難監門將軍王君各百餘字徒存形似惟唐儉有字千
一百乙速孤行有字千四百劉憲撰白義暉分書李衛
公有字千五百許敬宗撰王知敬書李勣有字千八百
高宗御製御書乙速孤昭字至二千五百餘苗神客撰
釋行滿書又一碑字可百五六十能辨前有蘭陵公主
字中有詔蘭陵殆有二碑殊不可曉凡不註撰書姓氏者無考余摩
娑展玩類為一帙名曰昭陵碎墨大抵唐人書即方圓

疎密不同而運轉結構法多相類惜叔氏不全

昭陵志

聖教序並記分刻二碑於慈恩寺塔下分東西兩龕置之書法道健然用筆輕細後署永徽四年書同州序記并書一碑道逸婉媚波拂處虬如鉄線後署龍朔三年書按玉海太宗製聖教序高宗為太子又述記并勒碑置慈恩寺浮圖永徽四年褚遂良書則寺塔本似是真蹟而同州本反勝何也李英公陪葬昭陵碑文高宗製並書行草神逸機流後半尤縱橫自如碑首御製御書

四字大類褚登善萬年宮即九成宮改名高宗幸而銘之書之行草尤為勁拔碑陰云奉勅中書門下見從文武三品以上并學士并聽自書官名後列從官五十餘人長孫無忌李勣褚遂良輩皆與焉書名大小不倫然皆有法即契苾賀蘭亦不草草九成宮醴泉銘歐書皇甫君道勁此碑婉潤宋趙子固謂率更化度醴泉為楷法第一今巍然獨存者醴泉耳化度寺在朱雀街今無復蘭若之迹不知碑亡在何時孔子廟堂碑評者謂虞

永興如層臺緩步高謝風塵又如行人妙選罕有失詞
觀此碑果不虛也賈耽相公云孔子廟堂碑青箱至寶
今碑已經五代翻刻尚爾則當時可知但碑已斷泐在

西安府學

石墨
鐫華

興平石觀音像吳道子所畫昭陵故物也農人得之地
中見一方石遂移送女家供砧衣既而祥光照屋拂拭
之乃觀音像下有數十字并吳道子名俗人不解搨盛
飾以金視為家珍

興平
志

蘇許公瓌景雲元年葬於武功碑隸書剝蝕過半書法
猶有漢魏遺意考文苑英華盧藏用撰序張說撰銘今
碑後猶有范陽張說字述聖紀碑立乾陵今倒仆折為
數段止存兩段耳據金石錄武后製中宗書字法道健
深得歐虞遺意

石墨
鐫華

西安府學宮唐宋之碑林立俗稱碑洞長安縣有景龍
鐘銘為唐睿宗書因去洞遠而搨者必塞其內空緣梯
而上乃可推刷故罕傳於世然文體古雅書法道媚極

可愛也

觚觚

京兆闕闕間有唐國子監存焉其間石經乃開成中鐫刻唐史載文宗時太學勒石而鄭覃與周墀等校定九經文字上石及覃以宰相兼祭酒於是進石碑九經一百六十卷即今之石經是已明皇注孝經碑及建學碑則立之中央顏褚歐陽徐柳之書逮偏旁字源之類則分布於庭之左右如入東序弘壁琬琰爛然盈目

咸寧縣志

唐顏氏家廟碑李冰陽篆額顏真卿撰書爭坐位書藁

顏真卿撰行書尚書馮宿碑王起撰柳公權書邠國公
功德銘楊承和撰書元秘塔碑裴休撰柳公權書不空
禪師碑嚴郢撰徐浩書道因禪師碑李儼撰歐陽通書
楚金禪師碑沙門飛錫撰吳通微書大智禪師碑嚴挺
之撰史惟則書隆闡禪師碑淨住寺文賢像銘李陽冰
先塋記三墳記張旭斷碑千文肚痛帖草書心經懷素
藏真律公帖聖母帖草書千文題名石柱俱在西安府

學

石墨
鐫華

吳岳碑自首至座七段明皇八分書為黃巢所焚摧剝
僅可辨當時日書三字發三驛刻工亦然

畫墁錄

華嶽碑玄宗自書御製碑文碑高五十餘尺闊丈餘厚四
五尺其陰刻扈從太子王公已下官名制作壯麗鐫琢

精巧

開元傳
信記

唐虞公溫彥博碑岑文本撰歐陽詢書在醴泉縣惜碑
已殘後世不復見涼國公主碑蘇頲撰明皇御書在蒲
城縣公主先嫁薛伯陽再嫁溫彥博曾孫曦史遺曦不

書而碑不言伯陽

石墨
錫華

大安國寺睿宗為相王時舊邸也即尊位乃建道場嘗
施一寶珠令鎮常住庫開元十年寺僧造功德開櫃物
閱將貨之見函封曰此珠直億萬開之狀如片石赤色
夜則微光高數寸有西域胡人見珠大喜使譯問僧
曰一億萬胡人曰珠價誠直億萬然胡客久納錢四千
萬市之僧問胡從何來胡曰吾大食國人貞觀初通好
來貢此珠後吾國常念之此水珠也每軍行休時掘地

二尺埋珠於其中水泉出可給數千人故軍行常不乏
水胡人命掘土藏珠有頃泉湧其色清冷流汎僧取飲
之方悟靈異胡人乃持珠去

鴻書

唐田仁晚德政碑蘇靈芝書蘇武功人生開寶間書與
胡需然齊名唐集右軍殘碑已斷缺棄西安城南隍中
王生堯惠輩見之以語郡守昇置類宮碑為大將軍吳
文立弘福寺大雅集右軍書觀其筆法去聖教遠甚應
是集字者不及懷仁而碑中有開元九年字疑又從聖

教序諸刻中摹集非右軍真蹟也昭仁寺碑在長武朱
子奢撰無書者姓名觀其筆法大類廟堂廟堂豐逸此
稍瘦勁廟堂五代重勒此伯施真蹟也夢真容碑按碑開元
帝夢老子真容求得之中南樓觀今中南樓觀有此碑龔靈芝
書華岳精享碑開元帝遣蘇頲禱雨華山有應而建也
作者為主簿咸廩書者為御史劉升今觀其隸古適逸
有漢人遺意述聖頌碑在華陰縣岳廟中達奚珣撰序
呂向撰頌并書不著年月今碑已裂跌尚存如山上存

二字大可徑四寸許分隸不減太山銘姜嫄公劉廟碑
在邠州張獻甫為節度作廟高郢撰張誼書誼于書家
不甚著此書不及王縉而畧似柳公權

石墨
鐫華

長安府錄廳前石幢即郎官題名石也張長史書序張
君作字詭怪顛倒不可名狀至為楷法整若軍陣

畫
錄

天寶三載五月十五日揚州進水心鏡青瑩耀日背有
盤龍勢如生動元宗異之七載秦中大旱詔葉法善於
內庫閱此鏡曰鏡龍真龍也上幸凝陰殿詔法善祠鏡

龍忽見梁棟及鏡龍口鼻有白氣須臾滿殿遂徧城內

甘雨大澍

唐鏡
龍記

白鶴觀碑按觀故址在宜川縣南三里有倒碑俗號碑
子衡衡碑文剥落不可讀約略其詞乃明皇夢李耳云
吾汝始祖命近臣訪我於東北五百里外當授汝符瑞
覺後乃遣五兵尚書牛仙客如夢求之惟肖即此地起
觀制類興慶宮碑倒二百年五代勸農使立之復倒五
百年土蝕其半

延安
府志

長安任中宣家素蓄寶鏡謂之飛精識者謂是三代物
後有八字近籀篆云水銀陰精百鍊成鏡云商山樵者

石下得之

龍成錄

宣政間長安人牧牛於野一日大雪視牛卧處獨不積
異而掘之得石匣刻曰開元祭地黃琮啟之得琮形如
今制白色美玉其中方寸許作新粟也

睽車志

沈監運得異石於葉石林之廢圃有刻曰採菱渡其陽
字二行背有印文復刻摩詰詩於下方云採菱渡頭風

急策杖林中日斜杏樹壇邊漁父桃花源裡人家此輞
川舊物立於採菱渡者

陳眉公
秘笈

常樂坊趙景公寺有嵌七寶字多心經小屏風盛以寶
函上有襍色珠及白珠駢甃亂目安祿山亂宮人藏於
寺中屏風十五牒三十行

寺塔
記

唐美原夫子廟碑縣令王岳撰並書岳天寶時人字書
奇怪初無筆法而老逸不羈時有可愛書中狂士也

六一

跋題

郭敬之家廟碑在今陝西布政司御題額顏魯公撰并書敬之汾陽忠武王父也碑陰具述汾陽兄弟子孫始知汾陽兄弟九人皆列大位不止史所稱幼明一人而已碑真書陰作行書多寶佛塔感應碑魯公正書舊在興平千佛寺移立西安府學雲麾將軍碑北海書雖剝蝕過半而存者其銚鍛凜然碑在蒲城李思訓墓處段行琛碑書法道逸豐美書者為張增按碑行琛者忠烈公秀實父忠烈公汧陽人碑在汧陽完好可搨西平忠

武李晟碑在高陵縣王墓前裴晉公撰柳誠懸書已磨

泐不可讀都元敬錄其文止缺數字

石墨
鐫華

蒲城胡珣神道碑韓文公撰胡証書在尉廩支槽近置

於夫子廟

江陵集
雜志

鳳翔府岐陽鎮法門寺塔下層有石芙蓉工製精妙每

一葉上刻一施金錢人姓名殆數千人宮女姓名為多

如曰張好好李水水之類與慈恩寺塔塼上所書同

開見

後錄

華州王氏掘地得石一片云員外郎瑯琊顏真卿書又有云都官郎中東海徐浩篆其餘數十字則不成文不

知何碑

石墨
鵝華

長安故宮闕前有唐肺石宋時尚在其制如佛寺所擊響石而甚大可長八九尺形如垂肺亦有款識但漶漫

不可讀

天祿
識餘

朝士黃秉少居長安遊驪山值道士理故宮石渠石下得折玉釵刻為鳳首已破缺然製作精巧後人不能為

也

夢溪筆談

唐李元諒昭德懋功碑李元諒者駱元光賜姓名也以朱泚之亂能鎮定華州將徙治隴右華州人感之行軍司馬董叔經請於天子立碑述頌也張濛撰韓秀弼分書咸陽原有無畏不空禪師墓有塔記作於開元二十五年書法似顏平原已經再刊亡其筆意寂照和尚碑在咸陽西馬跑泉地中武功康子秀暨於道傍其後王咸陽移之城中寺以碑有安國寺字遂改名寺為安國

按碑段成式撰文僧無可書成式文筆自奇此文尤奇
無可賈島從弟其書法出柳誠懸而優孟者

石墨
鵝華

王忠嗣神道碑唐元載撰王縉書在渭南縣東南廣鄉

原北官道南

雍勝
畧

長安菩提寺僧廣祝李林甫功德冀獲厚襯簾下出綵
筐香羅帕籍一物如朽釘長數寸僧歸大失所望携至
西市示於胡商曰此寶價值一十萬遂與之僧訪其名

曰此寶骨也

酉陽
雜俎

唐大遍覺禪師塔銘玄奘據史卒於顯慶六年銘云卒於麟德元年先葬滄東後移樊川北原開成四年劉軻撰文僧建初書行草秀勁有法基公塔銘基公者尉遲敬德之從子也度為僧譯經於慈恩寺卒於永淳中太和間始建塔李弘度銘之書者亦建初然其筆法少遜

元奘塔銘

石墨
鵝華

唐石鼓經咒以石為鼓而週刻尊勝經咒書道健有法鼓下作石山山上作天王鬼神以戴之在醴泉縣趙村

廣濟寺後

石墨
鐫華

馮翊嚴生嘗遊岷山得一物狀若彈丸色黑而大有光
視之潔徹若輕冰後遊長安于春明門逢一胡人言衣
橐中有奇寶願得一見生以示胡人捧之喜願以三十
萬為價曰此乃吾國清水珠置於濁水冷然洞徹自亡
此寶吾國井泉盡濁國人俱病故越海踰山來中夏求
之即命注濁水於缶以珠投之俄而澹然清瑩纖毫可
辨生以珠與胡獲價而去

太平
廣記

李德裕任中書常飲常州惠山井泉自毗至京置遞鋪有僧謁德裕曰京都一眼井與惠山寺泉脈相通在昊天觀後德裕乃以惠山一甕昊天一甕雜以八瓶都十瓶暗記出處僧因啜嘗惠山寺與昊天餘八乃同味德裕奇之當時停其遞運

芝田錄

扶風縣西南有三寶村故老傳云建村時有胡僧曰地有寶氣此交趾之寶數有三焉因以三寶名村開成元年有牧豎望見西原下炯然有光里人夜尋其光相與

植表以識之明日窮表之下得一金龜長二寸許製度
奇妙又得寶劍一長二尺有四寸又得古鏡一徑一尺
餘里人遂持以詣縣時縣令沛國劉隨發矧其劍澹然
若水利如切玉其鏡背文跡繁會有異獸環繞鏡鼻乃
命磨瑩其清若水時陳君節度岐隴得而愛之因有其
寶由是人無知者

宣室志

唐周公祠靈泉碑泉湧出大五小七觀察崔珙奏狀勒
石事在大中間石前刻奏狀中刻宣宗批荅後刻珙謝

表文詞婉至有盛世風書亦道健有法濟安侯廟記在
華州昭宗在富平韓建迎之至華自華歸長安褒建而
及於城隍神記為諫議大夫李巨川撰拾遺柳懷素書
文固諛詞而楷則嚴整武安君廟記廟在今咸陽東古
杜郵壁間記唐乾符五年重修正書道勁亦有歐法李
輔光墓志巨雅正書清勁有聖教遺意在咸陽東北近

涇

石墨
鐫華

祭顏杲卿並十三姪文真卿行書祭伯父濠州刺史文

稿真卿行書金蘭帖歐陽率更真書凡六十字俱在陝
西西安府學羽林大將軍臧懷亮碑李邕行書道媚圖
健可愛在三原縣臧氏墓上一行禪師塔碑明皇御製
文八分御書在灞橋東原上搗衣篇僧彥修草書在西
安府學上京薦福寺碑韓擇木八分書史惟則篆額在
西安府景風街仁王寺中贈榮州刺史碑唐張頌行書
在三原縣北墓上唐元度十八體書在西安府香城寺
中蘭亭詩序褚遂良臨本後有延陵之印在同州學中

格古
要論

唐宗聖觀碑歐陽詢撰序陳叔達撰銘在盩厔縣將軍
臧懷恪碑顏真卿撰書在三原縣靈應頌碑戴璇撰序
劉同昇撰頌戴伋書在盩厔縣顏真卿奉使題字在同
州華岳題名碑在華陰縣淄川公李孝同碑諸葛思楨
書祝府君碑子欽明撰李劍州廣業碑于大猷碑在三
原縣贈池州刺史馮公碑崔尚撰郭謙光書在咸陽縣
臨淮武穆王李光弼碑顏真卿撰張少悌書在富平縣

契苾明碑婁師德撰殷元祚書在咸陽縣昭告華陰碑
韓賞撰韓擇木書在華陰縣圭峰禪師碑裴休撰書在
鄠縣杜順和尚碑杜殷撰董景仁書在長安開佛寺御
史臺精舍碑崔湜撰梁升卿書在西安府學法門寺重
修塔廟碑薛昌撰王仁恭書在扶風縣順陵碑武三思
撰相王旦書在咸陽縣今亡宗聖觀主尹文操碑員半
千撰在藍屋縣淨業禪師塔銘畢彥雄撰在香積寺石
幢燃燈功德碑在香積寺陳居士殘碑武功人耕而獲

斷碑首題曰大唐隸川陳居士塔銘

石墨鵲華 按三原北原上有志

寧藏希晏墓碑俱唐人書而金石諸錄俱闕故附識於此

宋譯三藏聖教序碑太宗御製沙門曇勝書勸慎刑碑

趙迥撰盧經書清淨獲命得道經龐仁顯書摩利支天

并陰符經袁正己書郭忠恕三體陰符經篆書千字文

序陶穀撰皇甫儼書篆書千字文夢瑛篆袁正己隸書

夢英十八體書偏旁篆書夢英夫子廟堂碑刻僧彥修

草書抄高僧傳序陶穀撰夢英書僧正己書偈語碑贈

夢英大士詩僧正蒙書俱在西安府學

石墨
鵝華

宋同州龍興寺塔碑寺建自隋而重修於宋開寶之末
碑內有云府主連帥太師者有曰通摠隴右公者有曰
觀風譙郡夏侯公者皆不可考作碑者名此而不言其
姓書者并無姓名書法率更方整有之道逸不及也

石墨

鵝華

宋修周武王廟碑盧多遜撰孫崇望行書開寶六年建

廟近王陵今廢圯碑不知何時移咸陽城中

石墨
鵝華

鳳州遁跡山景德二年軍人楊起入一洞穴中有石架
鏡圍五寸背鑄水族回環有銘三十二字曰鍊形神冶
瑩質良工當眉寫翠對臉傳紅如珠出匣似月停空綺
窓繡幌俱含影中方取鏡而聞後有風雨聲既出穴鏡
存而匣已爛矣

學齋
佔俾

清和觀在同州儒學西北宋為神霄玉清萬壽宮萬歷
間於觀南掘得銅章方二寸餘其文曰同州玉清萬壽

宮印型鑄甚工文深寸許

同州
志

楊褒皇祐中宿華州西陰寺夜間見光煜然視之石也
意其隱玉使工割之得玉徑數寸光采粲然玉人驚曰
至寶也會朝廷求玉琢鎮國寶褒獻之遂為璽

渾水燕
談錄

自炭谷口行十餘里磴道之半有司馬溫公隸書二十
八字曰登山有道徐行則不困擇平穩之地而置足則
不跌人莫不知之鮮能慎

遊城南
記

張浮休云盜夜發咸陽原上古墓有火光出用劍擊之
鏗然以墜視之白玉簾也有中官取以作箕籌浮休亦

得一二

聞見後錄

宋普濟禪院碑在汴陽于侍御永清始獲之亟稱賞以

為不減聖教序書者為僧善雋其年大中祥符

石墨鵝華

某到醴泉改堊少師求得少師綠玉枕於四翁汝和家

伊川家世舊聞

長安慈恩寺塔有唐新進士題名雖妍媸不同皆高古

有法宣和初本路漕柳城集而刻之石亦為奇玩

子懶真

修內司十七帖宋淳熙中刻於關中

續文獻通考

興安州南三里蜀漢西城郡也宋慶元五年寧宗御書

枕戈二大字以賜郭倪刻於石

賈志

王仲至帥長安日壞一古塚有碧甕器容水一斛中有白玉嬰兒高尺餘水不耗散如新汲者玉嬰兒為仲至

取去

聞見後錄

土人掘得雷祥遺器形製古質色綠沉隱秀或微作花

墳起以手摩抄復勻潔無凸窪跡

白水縣志

宋復唯識解院碑藍田故龍泉寺也有洪集者與姚氏

共復之而為之碑書或正或行或草或兼一二筆小篆分隸其草又時作渴筆極奇怪道偉似魯公誠懸而時復出入但記者書者闕其姓名獨刻者張道姓名無恙賜西岳廟乳香碑正書亦有柳誠懸筆意游師雄墓志張舜民撰書者為邵毓清圓秀勁大足名家樞密趙瞻碑瞻蓋屋人卒塋城南四里碑仆而泐僅有數十字可辨觀其書法勁健

石墨
鵝華

應夢寺後有石相傳以為殞星必不可動一胡僧見之

曰此文星也里諸生祭而掘之遂徙之寺前後里人郭

玉柱於東鄉得一石亦曰文星置之星聚書院

醴泉縣志

朝邑舊治在西原耕者往往得瓦缶一人得古鏡其背銘曰買得秦王鏡判不惜千金非關欲照膽持此自明

心

朝邑縣志

澄城鄭某嘉靖間掘得一陶枕製頗工緻中央有刻云天聽寂無聲云云兩旁對云賣酒樓頭風颭颭織綾梭畔雨瀟瀟不知何謂吟則康節筆也

澄城縣志

玉盆在褒城縣北八里水中乃石生成不費斧鑿光潔如玉內有玉盆二大字仍鐫唐詩曰石磴盆琢玉川激

水拖藍

賈志

千金寶要者宋學士郭思按唐孫真人千金方纂要也宣和六年思刻于華州公署明正統八年華州知州劉整重刻予得之珍如拱璧因刻耀州真人洞前云隆慶六年秦王守中識

千金寶要序

風雅

天作周祭岐山配以大王文王之詩

申培詩說

襄公伐戎初命為秦伯國人榮之賦車轡

詩傳

蒹葭君子隱於河上秦人慕之而作是詩

詩說

終南戒襄公也能取周地始為諸侯受顯服大夫美之

故作是詩以勸戒之

詩小序

穆公卒塋雍秦之良臣子輿氏三人從死秦人哀之為

作黃鳥之詩

史記秦本紀

百里奚為秦相作樂所僨澣婦自言知音呼之援琴撫

弦而歌曰百里奚五羊皮臨別時烹伏雌炊麋彘今日
富貴忘我為因問之乃其妻云

事文
類聚

秦康公母晉獻公女文公遭驪姬之難未反而秦姬卒
穆公納文公康公時為太子贈送文公於渭陽念母之
不見也我見舅氏如母存焉作渭陽之詩

毛詩
序

襄公十四年夏諸侯之大夫從晉侯伐秦及涇不濟叔
向見叔孫穆子穆子賦苑有苦葉叔向退而具舟

左
傳

昭王在隨申包胥如秦乞師立依於庭牆而哭秦哀公

為之賦無衣

左傳

秦始皇陵在驪山北於渭北諸山運取大石故其歌曰

運石甘泉口渭水為不流千人一唱萬人相鉤

關中記

古丈夫者秦時驪山役夫毛女秦宮女並以計得脫入
山大中初有陶太白尹子虛者採藥入芙蓉峯遇之一

古服儼雅一鬟髻綠衣相與傾壺而飲飲盡古丈夫折
松枝叩壺而吟毛女和之曰誰知古是與今非閒躡青
霞繞翠微簫管秦樓應寂寂彩雲空惹薜蘿衣又毛女

正美贈華山遊人詩曰曾折寒枝為寶櫛又編栗葉代

羅襦有時却問秦宮事笑樵山花望太虛

全唐詩

司馬相如為上林子虛賦意思蕭散不復與外事相關
控引天地錯綜古今忽然而睡煥然而興幾百日而後

成

西京雜記

漢武始穿昆靈之池泛翔禽之舟自造歌曲使女伶歌
之時日已西傾涼風激水女伶歌聲甚道因賦落葉哀

蟬之曲

拾遺記

昭帝元始元年穿淋池廣千步時命水嬉遊宴以文梓
為船木蘭為柂隨風輕漾畢景忘歸使宮人歌曰秋素
景兮泛洪波揮纖手兮折芰荷涼風淒淒揚棹歌雲光
開曙月低河萬歲為樂豈云多帝乃大悅

拾遺記

漢苑中有柳狀如人號曰人柳一日三起三倒李商隱
賦云不比禁中人柳終朝剝得三眠

侯鯖錄

漢傳毅扶風茂陵人永平中於平陵習章句因作廸志

詩

漢詩評

漢時有短簫鏡歌之樂其曲有艾如張上之回戰城南
將進酒及魏受命改將進酒為平關中言曹公征馬超
定關中也北齊受東魏禪武成帝時漢上之回改名定
關隴言神武遣侯莫陳悅誅賀拔岳定關隴平河外漢
北欸秦中附也後周宣帝時改漢艾如張為迎魏帝言
魏武西幸太祖奉迎宅關中也改漢戰城南為尅河苑
言太祖俘斬齊十萬衆於河苑神武脫身至河單舟走

脫也

冊府
元龜

陳安善撫將士及死隴上人思之為作壯士之歌曰隴
上壯士有陳安軀幹雖小腹中寬愛養將士同心肝驕
驄文馬鐵鍛鞍七尺大刀奮如湍丈八蛇矛左右盤十
盪十決無當前戰始三交失蛇矛棄我驕驄竄岩幽為
我外援而懸頭西流之水東流河一去不還復奈何劉
曜聞而嘉傷命樂府歌之

通鑑注

永興二年四月苻堅如龍門五時八月自臨晉登龍門
至韓原觀晉魏顆鬼結草坑秦軍之處賦詩而歸

前秦錄

符堅分四帥子弟三千戶配長樂公丕鎮鄴親送於灞
上流涕而別趙整援琴而歌曰阿得脂阿得脂博勞舊
父是仇綏尾長翼短不能飛遠徙種人留鮮卑一旦緩
急語阿誰堅笑而不納

十六國春秋

陸覲與范蔚宗相善自江南寄梅一枝詣長安與蔚宗
因贈以詩云折梅逢驛使寄與隴頭人江南無所有聊

贈一枝春

桂林記

周滅齊以後主歸長安為詩曰龍樓絕行跡鳳闕永無

因獨知明月夜遙想鄴城人

五代新聞

武功縣南唐高祖故宅貞觀六年幸之賞賜閭里同漢沛宛帝懽甚賦詩命起居郎呂才被之管絃為功成慶

善樂

賈志

京城內金吾曉暝傳呼以戒行者馬周獻章始置街鼓俗號鑿鑿有道人裴脩然戲為渭川歌詞曰遮莫鑿鑿

鼓須傾湛湛盃金吾倘借問報道玉山頽

大唐新語

貞觀中蜀人李義甫八歲時以神童至京師太宗在上

林苑便對有得鳥者上賜義甫義甫即時進詩曰日裏
颺朝彩琴中伴夜啼上林如許樹不借一枝棲上笑曰

朕今以全樹借汝

間居
筆記

唐元奘禪師往西域房前有松其枝西偃忽一日枝東
偃弟子曰師歸矣果然李洞送僧歸南海詩長安却回

日松偃舊房前正用此事

全唐
詩話

慈恩寺與舍元殿正相值建塔始置十層後減為七層

盧照鄰詩云十層碧瓦搖虛空四十門開面面風

畫漫
錄

按二句本章八
元詩誤作照鄰

大足元年幸京師同州刺史蘇瓌進聖主還京樂舞御
行宮樓觀之賜以求帛令編於樂府

冊府
元龜

神龍以來杏園宴後皆於慈恩塔下題名同年中推一
善書者紀之他時有將相則朱書之及第後知聞或遇未
及第時題名處則為添前字故昔人有詩云曾題名處
添前字送出城人乞舊衣

撫
言

唐神龍之際京城正月望日盛飾燈影之會金吾弛禁

特許夜行王主之家馬上作樂以相誇競文士皆賦詩以紀其事作者數百人惟中書侍郎蘇味道吏部員外郭利貞殿中侍御史崔湜三人為絕唱

杜陽雜俎

武后遊龍門命羣臣賦詩先成者賞錦袍左史東方虬既拜賜坐未安宋之問詩復成文理兼美左右莫不稱善乃就奪袍衣之

隋唐佳話

中宗景龍中凡天子饗會游豫宰相及學士得從春幸梨園並渭水祓除則賜細柳園辟廂夏宴蒲萄園賜朱

櫻秋登慈恩浮圖獻菊花酒稱壽冬幸新豐歷白鹿觀
上驪山賜浴湯池給香粉蘭澤帝有所感即賦詩學士

皆屬和

唐書李
適傳

中宗正月晦日幸昆明池賦詩羣臣應制百餘篇殿前
結綵樓命昭容選一篇為新翻御製曲從臣悉集其下
須臾紙落如飛各認其名而懷之惟沈宋二詩不下移
時一紙飛墜競取而觀乃沈詩也評曰二詩工力悉敵
沈詩落句詞氣已竭宋詩云不愁明月盡自有夜珠來

猶陡健軒舉

全唐詩話

景龍中中宗嘗遊興慶池侍宴者遞起歌舞並唱迴波詞方便以求官爵給事中李景伯亦起舞歌曰迴波詞持酒卮微臣職在箴規侍宴既過三爵諠譁竊恐非儀于是罷宴

大唐新語

昆明池漢武所穿中宗朝安樂公主請焉帝不可主不悅因別掘一池號曰定昆池既成中宗往觀令公卿賦詩李黃門日知詩云但願暫使居者逸無使時傳作者

勞

隋唐佳話

開元時李嶠等作桃花詩帝令擇二十篇入樂府謂之

桃花行

珍珠船

元公禎為御史鞠獄梓潼時白尚書在京遊慈恩小酌
花下為詩寄元曰花時同醉破春愁醉折花枝當酒籌
忽憶故人千里去計程今日到梁州時元果及褒城亦
寄夢遊詩曰夢君兄弟曲江頭也向慈恩院裡遊驛吏
喚人排馬去勿驚身在古梁州千里神交若合符契

本事

詩

開元中詩人王昌齡高適王之渙齊名一日共詣旗亭
小飲忽有梨園伶官十數人登樓會讌俄有妙伎四輩
尋續而至昌齡等私相約曰我輩各擅詩名可密聽諸
伶所謳若詩入歌詞多者為優俄一伶唱曰寒雨連江
夜入吳平明送客楚山孤洛陽親友如相問一片冰心
在玉壺昌齡引手畫壁曰一絕句尋又一伶謳曰開簾
淚霑臆見君前日書夜臺何寂寞猶是子雲居適引手

畫壁曰一絕句尋又一伶謳曰奉帚平明金殿開強將
團扇共徘徊玉顏不及寒鴉色猶帶昭陽日影來昌齡
又引手畫壁曰二絕句之渙自以詩名已久因謂諸人
曰此輩潦倒樂官所唱皆巴人下里之詞耳因指諸伎
中最佳者曰待此子所唱如非我詩即終身不敢與子
爭衡矣須臾次至雙鬟發聲則曰黃河遠上白雲間一
片孤城萬仭山羌笛何須怨楊柳春風不度玉門關之
渙即擲掄二子曰田舍奴我豈妄哉因大諧笑諸伶不

喻其故皆起詣曰諸郎君何此喁喁昌齡等話其事諸

伶競拜乞俯就筵席三子從之歡醉竟日

唐詩紀事

開元中禁中初重木芍藥即今牡丹得四本紅紫淺紅
通白者移植於興慶池東沉香亭前會花方繁開上乘
月夜召太真妃以步輦從詔特選梨園子弟中尤者得
樂十六色李龜年手捧檀板押衆樂前欲歌之上曰賞
名花對妃子焉用舊歌詞為遂命李龜年持金花箋宣
賜翰林學士李白進清平調詞三章白承旨猶苦宿醒

未解因援筆賦之龜年以詞進上命梨園弟子約畧調
撫絲竹遂促龜年以歌太真持玻璃七寶杯酌西涼州
蒲萄酒笑領歌意

唐詩
紀事

開元時高太素起商山六館曰春雪未融館清夏晚雲
館中秋午月館冬日方出館暑簟清風館夜階急雨館

各製一銘

王壺
承

開元中有程脩已者善畫得進謁玄宗會莫春內殿牡
丹開上問脩已曰今京邑傳唱牡丹詩誰為首出對曰

聞公卿間多吟賞中書舍人李正封詩曰國色朝酣酒
天香夜染衣上聞之嗟賞移時

松憲
雜記

開元末裴士淹得白牡丹一窠植於長興私第天寶中
為都下所賞當時有白給事宅看牡丹詩曰長安年少
惜春殘爭認慈恩紫牡丹別有玉盤承露冷無人起就

月中看

酉陽
雜俎

予嘗秋日客咸陽寶釵樓上漢諸陵在晚照中有歌太

白樂遊原詞者一坐悽然而罷

邵博聞
見後錄

天寶二年韋堅引漕水抵苑東望春樓下為潭以通江
淮運船上幸望春樓觀新潭堅以新船數百艘徧榜郡
名各陳縣中珍貨於船頭陝尉崔成甫著錦半臂居前
船唱得寶歌曰得寶弘農野弘農得寶耶潭裡舟船開
揚州銅器多三郎當殿坐聽唱得寶歌使美婦百人盛
飾而和之

通鑑

驪山多飛禽名阿濫堆明皇御玉笛採其聲翻為曲子
名播於遠近人競以笛效吹故張祜詩云紅樹蕭蕭閣

半開玉皇曾幸此宮來至今風俗驪山下村笛猶吹阿

濫堆

碧雞漫誌

明皇幸蜀初入斜谷霖雨彌日棧道中間鈴聲帝方悼

念貴妃採其聲為雨淋鈴曲以寄恨時梨園弟子惟張

野狐一人善箏箏因吹遂傳于世

碧雞漫誌

長安春時盛於遊賞園林樹木無閒地故學士蘇頲應

制云飛埃結紅霧遊蓋飄青雲帝覽之加賞焉遂以御

花親插頰巾上時人榮之

開天遺事

長安民郭行先有女紹蘭適巨商任宗為賈湘中數年
音信不達蘭見雙燕戲於梁間長吁淚下語燕欲憑附
書於壻燕子飛鳴上下似有所諾遂飛泊膝上蘭乃吟
詩云我壻去重湖臨窓泣血書殷勤憑燕翼寄與薄情
夫小書其字繫於足上燕遂飛而去時任宗正在荊州
忽見一燕飛鳴泊於肩有書繫足上解而視之乃妻所
寄也宗感而泣下遂歸出詩示蘭後張說傳其事
開天遺事
天寶十三載太子賓客賀知章還鄉遣左右相以下祖

別於長樂坡上賦詩贈之

事文類聚

唐崔護清明獨遊都城南得村居叩門求飲有女子啟
闔以盂水至獨倚小桃柯而屬意殊厚崔護爾後絕不
復至來歲清明徑往尋之門庭如故而扃矣因題詩於
左扉云去年今日此門中人面桃花相映紅人面至今
何處去桃花依舊笑春風後數日復往聞其中哭聲叩
門有老父出曰君非崔護耶君殺吾女女笄未嫁自去
年來常惆悵如有所失比日與之出歸見左扉字入門

遂病絕食死崔大感痛請入哭之曰護在斯護在斯須
臾開目半日復活老父大喜以女歸之

本事詩

鄭廣文學書而病無紙知慈恩寺有柿葉數間屋遂借
僧房居止日取紅葉學書歲久殆徧後自寫所製詩並
畫同為一卷封進玄宗御筆書其尾曰鄭虔三絕

尚書故實

杜子美嘗駐車同官有縣古槐根出官清馬骨高之句

留置壁間

同官志

李白遊慈恩寺寺僧用水牌刷以吳膠粉捧乞新詩白

為題訖僧獻玄沙鉢綠英梅檀香筆格蘭縑袴紫瓊霜

海墨
微言

高德卿詩曰事去君王可奈何荒墳三尺馬嵬坡歸來
枉為香囊泣不道生靈淚更多金章宗詔錄馬嵬詩得
五百餘首付詞臣品第德卿等詩在高等

堅瓠
集

馬嵬佛堂楊妃縊所邇後才士經過賦詠以道其幽怨
不可勝紀皆以翠翹香鈿委於塵泥紅淒碧怨令人傷
悲雖調苦詞清無遜此意也丞相鄭畋為鳳翔從事日

題詩曰終是聖朝天子事景陽宮井又何人觀者以為

真輔國之句

闕史

唐人詠馬嵬事劉禹錫云官軍誅佞幸天子捨妖姬白
樂天詩曰六軍不發爭奈何婉轉蛾眉馬前死豈特不
曉文體亦失事君之禮老杜北征詩曰憶昨狼狽初事
與古先別姦臣竟道醢同惡隨蕩析不聞憂商哀中自
誅褒姒乃明皇鑒夏商之失畏天悔禍賜妃子死官軍

何預焉

事文類聚

王右丞嘗於清源寺壁畫輞川圖巖岫盤鬱水雲飛動
自製詩曰當世謬詞客前身應畫師不能舍餘習偶被

時人知

圖畫見
閩誌

唐中宗四年上巳祓禊於渭濱賦七言詩賜細柳園李
乂應制詩此日欣逢臨渭賞昔年空道濟汾詞沈佺期
詩寶馬香車清渭濱紅桃碧柳禊堂春皇情尚憶垂竿

佐天瑞先呈捧劍人

景龍文
館記

郭曖宴客有婢鏡兒善彈箏姿色絕代李端在坐時竊

寓目屬意甚深暖覺之曰李生能以彈箏為題賦詩娛
客吾當不惜此女李即席口號曰鳴箏金粟柱素手玉
房前欲得周郎顧時時誤拂絃暖大稱善徹席上金玉
酒器並以鏡兒贈李

釵小志

王易簡蕭希甫榜下及第名居榜尾不看榜歸華山尋
就山釋褐授華州幕官後拜拾遺又辭歸留詩曰汨沒
朝叅愧不才誰能低折向塵埃青山得去且歸去官職
有來且自來

郡閣雅言

德宗九月詔羣臣宴曲江自為詩敕宰相擇文人賡和
李泌等請羣臣皆和帝自第之以劉太真李紆等為上
鮑防于邵等次之張滿等為下與擇者四十一人

白孔
六帖

鄜州東百里有水名相思河傳舍曰相思鋪令狐楚詩
曰誰把相思號此河塞垣車馬往來多只應自古征人

淚灑向空川作碧波

詩話
總龜

呂渭遷禮部侍郎中書省有古柳建中末枯死德宗自

梁還復榮茂人以為瑞柳渭令貢士賦之

白孔
六帖

平曾謁華州李相不遇吟曰老夫三日門前立珠箔銀
屏晝不開詩卷却拋書袋裡譬如閒看華山來

撫言

長安西端正樹去馬嵬一舍之程乃唐德宗幸奉天覩
其蔽芾錫以美名後有文士經過題詩逆旅曰昔日偏
沾雨露榮德皇西幸賜嘉名馬嵬此去無多地合向楊

妃冢上生

太平
廣記

宣陽坊奉慈寺司農少卿楊敬之小女年十三以六韻
詩題此寺自稱關西孔子二十七代孫字德鄰警句云



日月金輪動旃檀碧樹秋塔分鴻雁翅鐘挂鳳皇樓事

聞因見勅賜衣

酉陽雜俎

驪山下逍遙別業蓋韋嗣立所建賦詩勒石在焉一夕

忽失碑字換墨題云曉星明滅白露點秋風落葉故址顏

垣冷烟衰草前朝宮闕長安道上行客依舊名利深切

改變容顏消磨今古隴頭殘月

閑居筆記

晉國公裴度討淮西題名於華嶽廟之闕門後司空圖

題詩紀之曰嶽前大隊赴淮西從此中原息鼓輦石闕

莫教苔蘚上分明認取晉公題

撫言

賈島字閻仙元和中元白尚輕淺島獨變格入僻雖行
坐寢食吟咏不輟嘗跨驢張蓋橫截天街時秋風正涼
黃葉可掃島忽吟曰落葉滿長安求聯句不可得因唐
突大京兆劉栖楚被繫一夕而釋之

撫言

又島在京師一日於驢上得句云鳥宿池邊樹僧敲月
下門始欲著推字又欲著敲字引手作推敲勢韓退之
權京兆尹車騎方出實不覺行至三節左右擁至尹前具

對所得詩句退之曰敲字佳因為布衣交

唐宋遺史

貞元末有布衣於長安中遊酒肆吟咏丐酒人以為狂
嘗吟云有形皆朽孰不知休吟春景與秋時爭如且醉

長安酒榮華零悴總奚為

全唐詩

許渾寄題商洛王隱士居詩云近逢商洛客知爾住南
塘草閣平春水柴門掩夕陽尋蜂收野蜜隨麝拾生香

更憶前年別松花滿石床

事文類聚

李賀以詩歌謁韓吏部吏部時為國子博士分司送客

歸極困門人呈卷解帶旋讀之首篇雁門太守行曰黑

雲壓城城欲摧甲光向日金鱗開却援帶命邀之

唐詩紀事

白尚書應舉初至京以詩謁顧著作顧覩姓名熟視白

公曰米價方貴居亦弗易乃披卷首篇曰咸陽原上草

一歲一枯榮野火燒不盡春風吹又生即嗟賞曰道得

箇語居即易矣

幽聞鼓吹

白樂天一舉及第詩曰慈恩塔下題名處十七人中最

少年時年二十七

撫言

又樂天及第時贈長安妓阿軟絕

句綠水紅蓮一朶新千花萬草無顏色

香山集

寶歷中楊相嗣復具慶下繼放兩榜大宴新昌里第諸
生翼坐元白俱在賦詩唯楊汝士詩後成最佳元白嘆
伏汝士醉歸曰我今日壓倒元白其詩警句云文章舊
價留鸞掖桃李新陰在鯉庭

推言

白樂天楊柳詞云一樹春風萬萬枝嫩於金色軟於絲
永豐東角荒園裡盡日無人屬阿誰及宣宗朝樂工唱
此詞上問永豐在何處左右具以對因命使取永豐柳

兩株於禁中

香奩
雜錄

喬彞京兆府解試時有二試官彞日午扣門試官令引
入則已醺醉視題曰幽蘭賦彞不肯作遂改渥洼馬賦
曰此可矣奮筆斯須而成警句云四蹄曳練翻瀚海之
驚瀾一噴生風下湘山之亂葉便欲首送京兆曰喬彞
崢嶸甚以解副薦之可也

幽閒
鼓吹

陝州廉使盧渥在舉場甚有時稱曾于渚水逆旅遇宣
宗微行意其貴人斂身迴避帝揖與相見乃自稱進士

盧渥帝請詩卷袖之乘驢而去他日對宰相語及盧渥
令主司擢第宰相問渥與主上有何階緣渥乃具陳因
由時亦不以為忤

北夢
瑣言

唐人餞別多唱渭城即王右丞渭城朝雨浥輕塵詩也
每句皆再唱而第一句不疊故曰陽關三疊白香山詩
云相逢且莫推辭醉聽唱陽關第四聲註云第四聲勸
君更進一杯酒也若秋澗集所云就中儘是銷魂處不
待聽歌第四聲乃西出陽關無故人句也

堅齋
集

曲江亭子幸蜀之後皆燼於兵火惟尚書省亭子存焉
進士開讌常寄其間既撤饌則移樂泛舟公卿家傾城
縱觀鈿車珠幕櫛比而至

撫言

杜牧弱冠制策登第名振京邑嘗與同年城南遊覽至
文公寺有禪僧獨坐問杜姓字以告又云修何業旁人
以累捷誇之顧而笑曰皆不知也杜嘆訝因題詩曰家
住城南杜曲傍兩枝仙桂一時芳山僧都未知名姓始覺

空門興味長

本事詩

楊敬之撰華山賦李太尉每置坐右行坐諷詠

北夢瑣言

同州白樓令狐楚作賦刻其上

隋唐佳話

相國綦善詩或曰相國近為新詩否曰詩思在霸橋風

雪中驢子上此何以得之

全唐詩話

常莊幼時常在華州下邽縣僑居多與隣巷諸兒會戲

及廣明亂後再經舊里追思往事但有遺跡因賦詩以

記之

太平廣記

唐末羅虬兄弟俱有文名時號三羅虬登科從事坊州

有營妓紅兒先為郡將所嬖蚪亦悅之郡將不能容蚪
棄官去然於紅兒猶不忘也擬諸美物作比紅兒詩百

首事出撫言

邵博聞
見後錄

元稹為御史奉使東川宴於褒城驛竇明府廳虞鄉黃
丞犯令逃去再使東川至褒城驛黃丞餽酒艤舟稹與
同酌作詩贈黃曰昔年曾痛飲黃令困飛觥席上當時
走馬前今日迎迤邐七盤路坡蛇數丈城花疑褒女笑棧
息武侯征一種埋幽石空聞千載名

本事
詩

聶夷中字坦之咸通中為華陰尉體國憂民其詩曰二
月賣新絲五月糶新穀醫得眼前瘡剗却心頭肉我願
君王心化作光明燭休照綺羅筵只照逃亡屋仁民之
情勃不可禦

華陰縣志

長安南山下書生作小圃蒔花木一日有犢車麗女來
飲於庭邀書生同席既去作詩云相思無路莫相思風
裡楊花只片時惆悵深閨獨歸處曉鶯啼斷綠楊枝詩

婉約可愛

全唐詩話

僖宗幸蜀有詞人於馬嵬驛題詩云馬嵬烟柳正依依
重見鑾輿幸蜀歸泉下阿蠻應有語這回休更泥楊妃

抒情
詩

崔魯華清宮詩曰障掩金雞蓄禍機翠華西拂蜀雲飛
珠簾一閉朝元閣不見人歸見雁歸又曰草遮回磴絕
鳴鑾雲樹深深碧殿寒明月自來還自去更無人倚玉
闌干楊太史慎謂此詩精練奇麗遠出李義山杜牧之

上
鴻書

咸陽郭氏殷室也有蒼頭曰捧劍嘗望水眺雲不遵驅策忽題詩一篇曰青鳥銜蒲萄飛上金井欄美人恐驚去不敢卷簾看儒士聞而競勸以為協律之詞其後將竄復留詩曰珍重郭四郎臨行不得別曉漏動離心輕車冒殘雪欲出主人門零涕暗嗚咽萬里隔關山一心

思漢月

雲谿
友議

五代之亂干戈日尋鄭雲隱於華山與羅隱終日怡然對飲有酒詩二十章好事者繪為圖以相貺遺

酒譜

王仁裕嘗從事漢中巴山有採捕者獻猿兒憐其小而
慧黠名曰野賓呼之則聲聲應對經年壯盛頗亦為患
於是頸上係紅綃一縷題詩曰放爾丁寧復故林舊來
行去好追尋月明巫峽堪憐靜路隔巴山莫厭深棲宿
免勞青嶂夢躋攀應慙碧雲心三秋果熟松梢健任抱
高枝徹曉吟使人送之孤雲兩角後罷職入蜀行次嶠
冢有巨猿於道畔古木之間垂身下顧紅綃彷彿從者
曰此野賓也呼之聲聲相應立馬移時不覺惻然遂繼

之一篇曰嶠冢祠邊漢水濱此猿連臂下嶙峋漸來子
細窺行客認得依稀是野賓月宿免勞羈絃夢松餐非
復稻梁身數聲腸斷和雲叫識是前年舊主人

王氏
見聞

長安市中有襤褸道人日入市飲酒問姓名不答詩云
酒盡君莫沽壺傾我當發城市多囂塵還山弄明月

清
閒

清
史

張乖崖布衣時素善陳搏嘗因夜話謂搏曰某欲分先
生華山一半住得無搏曰餘人則不可先輩則可後尹

蜀乘傳過華陰寄詩曰性愚不肯林泉住強邀清流擬

致君今日星馳劍南去回頭慚愧華山雲

青箱雜記

又乖崖

自成都召還寄陳搏詩云人世大抵重官榮見我西歸

夾路迎應被華山高士笑天真喪盡得浮名

侯鯖錄

文正祖唐公有詩贈華山陳希夷王侍郎帥陝嘗刻石
傳世逸上一聯云曾逢毛女話何事應見巨靈開此山

過庭錄

常得志京兆人博學善屬文官至秦王記室及王薨過

故宮為五言詩辭理悲壯甚為時人所重

冊府元龜

韓魏公為陝西開府李師中過陝席間命為官妓賈愛

卿賦之李曰願得貔貅十萬兵犬戎巢穴一時平歸來

不用封侯印只問君王乞愛卿

閒居筆記

太宗時宋太素自翰苑謫鄜州司馬詩云鄜州軍司馬

也好畫為屏又云官為軍司馬身是謫仙人

筆記

吳昊華州人嘗累舉不第負氣倜儻有縱橫材嘗與州人張元薄遊塞上觀覽山川有經畧西鄙意張有鷹詩

云有心待擲月中兔更向白雲頭上飛欲謁韓范二帥
耻自屈乃刻詩石上使人拽之市而笑其後姚嗣宗者
亦關中人與張吳相友善題詩崆峒寺云南粵干戈未
息肩五原金鼓又轟天崆峒山叟渾無語飽聽松聲春
晝眠范文正公廵邊見之大驚又有踏破賀蘭石掃清
西海塵大開雙白眼只見一青天之句後不知所之

清夜

錄

欲掛衣冠神武門先尋水竹渭南村卻將舊斬樓蘭劍

買得黃牛教子孫余舊見此詩於關右壁間愛之不知

何人詩也

東坡題跋按此亦關中姚嗣宗詩

李挺之之才慶厯中韓中令宣撫河東委以秦鳳鑄鐵

錢事行次鳳州為絕句云去年三月洛城遊今日尋春

到鳳州欲托雙魚附歸信嘉陵江水不東流

西溪叢話

曾子宣丞相元豐間帥慶州未至召還至陝府復還慶

州往來潼關夫人魏氏乃作詩戲丞相云使君自為君

恩厚不是區區愛華山

老學庵筆記

寇萊公典陝日與魏野同遊僧寺萊公舊日留題處皆
用碧紗籠之野詩則塵蒙其上時從行官妓之黠慧者
以紅袖拂之野顧萊公笑詠曰世情冷暖由分別何必

區區較異同但得常將紅袖拂也應勝似碧紗籠

堅齋集

蜀楊尚書玠致政歸長安舊居為人侵占子弟欲白於
官以白玠玠批紙尾云四隣侵我我從伊畢竟須思未

有時試上含元殿基望秋風秋草正離離

厚德錄

長安北禪寺石筍鄭天休資政題十字云春到不擇地

石旁花自開刊之

侯鯖錄

惠崇遊長安詩有人遊曲江少草入未央深之句

江隣幾雜

志

邵伯溫子文為陝西宣撫司書寫機宜文字與路鈐李君交往甚熟後十餘年子文與李氏邂逅長安而李君已歿適值其妻生辰命子姪宴子文於書舍遣舊婢出舞子文感愴宿昔即席作詞云翻翻繡袖上紅裯舞姬猶是舊精神坐中莫怪無歡意我與將軍是故人諸子

得之入呈其母皆感泣不自勝

過庭錄

華州以華山得名城中乃不見華山而同州見之故華人每曰世間多少不平事却被同州看華山張芸叟守同嘗用此語云我到左馮今一月何曾得見好孱顏蓋同州亦登高乃見之爾

老學庵筆記

景祐末元昊叛夏鄭公出鎮長安梅聖俞送詩云亞夫金鼓從天落韓信旌旗背水陳時獨刻公詩於石

劉貢父詩

黃子思云余嘗守咸陽縣解後臨渭河汀嶼中連歲秋
有孤雁棲於葭葦中今歲冬深不復至矣感而為詩題
亭壁云天寒霜落雁來棲歲晚川空雁不歸江海一身
多少事清風明月我沾衣

侯鯖
錄

宋高宗養鸚鵡數百一日問之曰思鄉否鸚鵡曰思鄉
遂遣還隴山後數年有使臣過隴山鸚鵡問曰上皇安
否使臣曰已崩矣皆悲鳴不已使臣賦詩曰隴口山深
草木荒行人到此斷肝腸耳邊不忍聽鸚鵡猶在枝頭

說上皇

間居
筆記

華陰道有宗澤石刻詩二首一云管茅作屋幾家居雲

碓風帘路不紆坡側杏花溪畔柳分明摩詰輞川圖

鴻書

麻仲英有俊才七歲能詩隨侍官廊州宋翰林白方謫

官廊聞而召之坐賦詩十篇宋大稱賞翌日宋以浣溪

牋李庭珪墨諸葛氏筆遺之乃贈以詩曰宣毫歛墨川

牋紙寄與麻家小秀才七歲能吟天骨異前生應析桂

枝來

澠水燕
談錄

种放別業在終南山性嗜酒躬耕種秫以自釀所居有
林泉之勝尤為幽絕真宗聞之遣中使攜畫工圖之放

詩云幽居帝畫看

澠水燕
談錄

長安有妓女曹文姬尤工翰墨為關中第一號為書仙
有任生者投之詩曰玉皇前殿掌書仙一染凡心謫九

天莫怪濃香薰骨麗雲衣曾惹御爐烟

麗情
集

鳳州當秦蜀之衝以柳手酒三絕名世風塵一起號為
邊鄙者四十年淳熙初太守傅子平為詩於壁云珍珠

不見小槽紅遐想柔荑嫩剥葱惟有萬條羅帶綠年年

依舊舞春風

舊鳳州志

潘逍遙嘗至陝觀華山留題云高愛三峰挿太虛昂頭
吟望倒騎驢傍人大笑從他笑終擬全家向上居時魏
仲先居陝有贈逍遙詩云從此華山圖籍上更添潘閣

倒騎驢

都穆南
濠詩話

彭公永福州人紹興間登第次子演嘗宿甘泉店因閒
步至一官舍梁上有紅絲羯鼓緇數條垂於地一老人

杖而守之曰此開元興慶宮也二百年中至此者十二人皆有留題請書一絕演即題云長安宮闕半蓬蒿塵暗虹梁羯鼓緇惟有水天明月夜一條空碧見秋毫

尚友

錄

樂天絕句作眼前景語往往入妙如上得藍輿未能去春風敷水店門前似出率易而風趣非雕琢所及予過其地憶白詩亦為之流連不發

香祖筆記

臨潼縣華清宮朝元閣題詠甚多惟陳文惠公二韻尤

為絕唱曰朝元高閣迥秋毫無隱情浮雲忽以蔽不見

漁陽城

青箱雜記

王履字安道崑山人洪武十六年秋七月游華山作圖四十幅記四篇詩一百五十首自有華山以來游而能圖圖而能記記而能詩窮覽太華之勝古今一人而已

列朝詩集

朱進父先生詩中獨好少陵先後與王京兆子臯秦太僕仲受康明府子秀張布衣致卿等結社吟咏關中風

雅寢昌無何有青藜社諸王孫詩益著先生季弟季量
從子子斗皆工詩子仲宗叔信季通皆能世其家學

來陽

伯文
集

李開先奉使銀夏訪康德涵王敬夫於武功鄠社之間
賦詩度曲引滿稱壽二公恨相見晚作塞上曲一百首

又通集古人塞上詩為一編

列朝詩集

三原王承裕七歲作屋隙詩曰風來桌上響月到枕邊

明

見聞錄

燃藜集所載雙烈詩云

一為涇陽劉澤潯妻李氏
一為三原馬建德妻秦氏天上

有明月清光常皎潔巖下有蒼松不畏繁霜烈闕輔有
完人志氣傲冰雪歸劉才一旬長途遇盜竊白刃甘如
飴紅顏冷於鐵避寇平古鄉荒村騰餘孽全身歸馬門
崩崖灑腔血天上月雖明弦望有盈缺巖下松亦青精
氣有銷歇何如二完人千秋存大節又為李可貞妻王
氏作池陽節孝詩云氏上有哀翁艱難茹薇蕨氏下無
兒孫一身獨孤子操作奉晨昏食飲得無闕終年未亡

人既孝而復節北風驚破帷茫茫泣秋月

遺聞錄

蘇生紫授邠州刺史時上郡劉石生避難居邠之公劉
崖刺史行部至崖於壁上得石生公劉墓詩四首大驚
援土人往候其門石生善言九經所為詩歌宏放有西

京之遺

受祺堂文集

明韓令左懋第將去韓徘徊太史公墓上愴然曰山川
俱有離別之色因賦詩有云海涯此後深相憶藜色和

烟身裏看

韓城縣志

康德涵既免以山水聲妓自娛間作樂府小令使二青衣被之絃索歌以侑觴西登吳嶽北陟九峻南訪經臺紫閣東躡太華歌其所製之詞飄然欲仙嘗生日邀名妓百人為百年會酒闌各書小令一闕命送諸王邸曰此差勝錦纏頭也

列朝詩集

顧大猷江都人嘗遊秦中賦詩弔古訪問康王遺妓召置坐中青衫白髮歌殘曲道故事風流慷慨長安少年

至今傳之

列朝詩集

孫太初年十八入終南繼入太白山嚼草木居息大石屋上時有所得赤脚散髮走最高峰持古松根叩巨竒

石以歌

山棲志

郇陽明有悟旻高僧也善詩有句云啼鳥歇時山寂寂

野花開處月蒼蒼

郇陽縣志

正德初關中盛傳朝議欲起三原王端毅公秦左史汝

南強景明上詩有云八十耆年一品官歸來清節雪霜

寒又云三公事業三槐傳留取完名久遠看

讀書鏡

渭城蕭登榮備衛秦藩請平流寇屢歷艱苦王嘉之有
云義在豈辭寒夜雪賊存何意故園春其孫弘士復輕
財敦義一時名士競為詩歌以美之錄其一不愧人間
七尺男千家烟火待分甘朝來厨下無餘粒且向隴頭
問耐菴耐菴弘士號也

遺聞錄

羽仙不知何許神女降韓城解公孫某樓上善詞賦傾
刻立就行草尤雄秀其詩云萬疊芙蓉列翠屏曉聞杰
閣誦元經振衣直上凌霄漢倚劍平臨壓斗星風引簫

聲來碧落雲連海氣散青冥仙盤乞得蓮花露天半飄

飄共御冷

韓城縣志

澄城孫嘉士閉戶讀書夜半忽聞人語云天有五星兮晦
明不一地有五嶽兮高卑不齊草木兮夭喬鳥獸兮走
飛人生造化兮一定而不可移開戶視之惟有山谷次

寥涼風響答而已

澄城縣志

府谷李玉衡國瑾為國學典簿日取國學經史板摩抄
讀之手爪盡黑久而淹貫為世名儒著有石花魚賦甚

佳
鈞所
偶筆

閒適

秦后子有寵於桓其母曰弗去懼選出奔晉后子享晉
侯造舟於河十里舍車自雍及絳歸取酬幣終事八反

左
傳

秦始皇置離宮延曼三百里各宮皆有鐘鼓帷幔美人
於其中而不移有經年不識天子者此離宮之始也
文帝居霸陵北臨廁指新豐路示慎夫人曰此走邯鄲

鴻書

道也因使慎夫人鼓瑟上自倚瑟而歌

史記張釋之傳

漢武帝乘鬱金楫泛積翠池自吹綠玉笛

珍珠船

武帝嘗以吸花絲錦賜麗娟命作舞衣春暮宴於花下
舞時故以袖拂落花滿身舞態愈媚謂之百花舞五陵
效之花寮小史

昆明池中有戈船樓船各數百艘樓船上建樓櫓戈船
上建戈矛四角悉垂幡旄蔭蔭照灼涯涘又有豫

章船一艘載千人

西陽雜俎

上林苑中廣長三百里天子春秋獵射苑中取禽無數

其中離宮七十所容千乘萬騎

漢舊儀

薛宣為左馮翊日至休吏賊曹掾張扶獨不肯休坐曹

治事宣出教曰義禮貴和人道尚通日至吏以令休所

由來久掾宜從衆扶慚

冊府元龜

韓嫣好彈嘗以金為丸所失日有十餘長安語曰苦饑

寒逐金丸京師兒童每聞嫣出彈輒隨之望丸之所落

拾焉

西京雜記

長安五陵人柘木為彈真珠為丸以彈鵲鳥

西京雜記

成帝河平二年悉封舅大將軍王鳳庶弟譚等五人同

日封故世謂之五侯爭為奢侈百姓歌之曰五侯初起

曲陽最怒壞絕高都

長安里名

竟連外杜土山漸臺西象白

虎

漢書王商傳

敞為京兆無威儀時罷朝會遇走馬章臺街使御史驅

自以便面拊馬又為婦畫眉長安中傳張京兆眉嫵

漢書

張敞
傳

哀帝為董賢起大第於北闕下重五殿洞六門柱壁皆
畫雲氣華譙山靈水怪或衣以綈綿或飾以金玉南門
三重署曰南中門南便門南上門東西各三門隨方面
題署亦如之樓閣臺榭轉相連注山池玩好窮極雕麗
茂陵少年李亨好馳駿狗逐狡獸或以鷹鷂逐雉兔
皆為之佳名楊萬年有猛犬名青駿買之百金茂陵
富人袁廣漢藏錐巨萬家僮八九百人於北邙山下築
園東西四里南北五里激流水注其內構石為山連延

數里養白鸚鵡紫鴛鴦鰲牛青兕奇獸怪禽委積其間
積沙為洲嶼激水為波潮其中致江鷗海鷺孕雛產鰕
延蔓林池奇樹異草靡不俱植屋皆徘徊連屬重閣脩
廊行之移晷不能遍也後沒為宮園鳥獸草木皆移置
上林苑中按北邙山在今興平茂陵文固陽善馴野雉為媒用
以射雉每以春月為茅障以自翳用鮭矢射之日連百
數茂陵輕薄者化之皆以雜寶錯廁翳障以青州蘆葦
為弩矢輕騎妖服追隨於路以為歡娛

西京雜記

韋師錫世為韋曲人遠祖夏後周時居此蕭然自適與族人處元等為放逸之友時人慕其間素號為逍遙公

明帝貽之詩曰香動秋蘭佩風飄蓮葉衣

遊城南注

周天元行幸同州增候正前驅戒道為三百六十重自應門至於赤岸澤數十里間幡旗相蔽音樂俱作又令虎賁持鉞馬上稱警蹕改同州宮為天成宮庚子至自同州詔天臺侍衛之官皆著五色及紅紫綠衣以雜色

為緣名曰品色衣

周書宣帝紀

後周金州李遷哲累世雄豪為鄉里所率服性復華侈能厚自奉養妾媵至有百數男女六十九人緣漢千餘里間第宅相次姬人之有子者分處其中各有僮僕閭宦守之遷哲每鳴笳導從往來其間縱酒讌飲盡生平之樂子孫叅見或忘其年名者披簿以審之

周書李遷哲傳

李客師衛國公靖季弟也少任俠以馳射為事貞觀初拜右武衛將軍年老致仕退居昆明之別業四時從禽無暫休息京城并南山至灋水鳥獸皆識之每出則鳥

鵲之類千萬為羣隨逐噪之時臨昆明池鳬雁亦皆散

去

冊府元龜

太宗酷好法書有大王真蹟三千六百紙率以一大二尺為一軸寶惜者獨蘭亭為最一日附耳語高宗曰吾千秋萬歲後與吾蘭亭將去也及奉諱之日用玉匣貯之藏於昭陵

尚書故實

西京懷德坊南門之東有鄒鳳熾家巨富家男女婢僕錦衣玉食服用器物皆一時驚異嘗因嫁女邀請朝士

往臨禮席賓客數十夜擬供帳脩極華麗及女郎將出
侍婢圍繞綺羅珠翠垂釵曳履尤艷麗者至數百人衆
皆愕然不知誰是新婦矣

獨異志

初則天世長安城東隅民王純家井溢浸成大池數十
頃號隆慶池相王子五王列第於其北望氣者言常鬱
鬱有帝王氣比日尤盛上幸隆慶池結綵為樓宴侍臣
泛舟戲象以厭之

通鑑

天授二年臘卿相等詐稱上苑花開請幸武則天許之

乃遣使宣詔曰明朝遊上苑火急報春知花須連夜發
莫待曉風吹於是凌晨名花瑞草咸發羣臣咸服其異

馬

卓異記

韋嗣立營構別業於驪山鳳凰原鸚鵡谷有重崖洞壑
飛流瀑水中宗幸焉封嗣立逍遙公名其所居曰清虛

原幽棲谷

長安志

唐中宗好擊毬由是風俗相尚駙馬武崇訓楊慎交灑

油以築毬場

通鑑

崇寧坊西南隅長寧公主宅盛加雕飾朱樓綺閣一時
絕勝又有山池別院山谷虧蔽勢若自然中宗及韋后
數遊此第流連彌日賦詩飲宴韋氏敗公主隨夫為外
官遂奏為觀詞人名士竟入遊賞

西京記

景龍四年八日立春上令侍臣迎春內出彩花樹人賜

一枚令學士賦詩

文昌雜記

樂遊園漢宣帝所立唐太平公主於原上置亭遊賞其
地四望寬敞每三月上巳九月重陽士女遊戲就此祓

襖登高幄幕雲布車馬填塞綺羅耀日馨香滿路朝士

詞人賦詩翼日傳於京師

西京記

玄宗自臨淄郡王為潞州別駕乞歸京師會春暮豪家
數輩盛酒饌遊於昆明池上戎服臂鷹直突會前諸子
輩頗有難色忽一少年持酒船唱令曰宜以門族官品
備陳之酒及於上上大聲曰曾祖天子父相王某臨淄
郡王也諸少年聞之驚走上因連飲三銀船徐乘馬去

松憲

雜記

景雲元年上御梨園毬塲命文武三品以上拋毬及分
朋拔河韋巨源唐休璟袁老隨絙踣地久之不能興上
及皇后妃主臨觀大笑

通鑑

睿宗御安福門外作燈輪高二十丈衣以錦綺飾以金
銀燃燈五萬盞望之如花樹宮女千數耀珠翠施香粉
又妙簡長安女千餘人衣服花釵稱是於燈輪下踏歌三

日

朝野
僉載

開元二年九月宴京師耆老於含元殿賜九十以上凡

杖八十鳩杖婦人亦如之賜於其家

白孔
六帖

開元二十三年正月御五鳳樓錫宴命三百里內刺史

縣令帥所部音樂集於樓下各較勝負

開天
遺事

洛人宋單父能種藝術凡牡丹變易千種紅白間色上
皇召至驪山植花萬本色樣不同賜金千餘兩內人呼

為花師

龍城
錄

上於華清宮新廣一湯制度宏麗安祿山以白玉為魚
龍鳧雁仍以石梁及石蓮花以獻雕鐫巧妙殆非人工

上命陳於湯中至解衣將入而魚龍鳬雁皆若奮鱗舉翼狀欲飛動上遽命撤去蓮花今猶存

明皇雜記

天寶初寧王日侍好聲樂風流蘊藉諸王弗如也至春時於後園中紉紅絲為繩密綴金鈴繫於花梢每有烏鵲翔集則令園吏掣鈴索以驚之蓋惜花之故也諸宮皆

效之

開天遺事

申王每醉即使宮婢將錦綵結一兜令宮妓輩擡舁歸寢宮本宮呼曰醉與每至冬月風雪苦寒之際使宮婢

密圍於坐以禦寒氣自呼為妓圍

開天遺事

楊國忠於冬月常選婢妾肥大者行列於前令遮風謂之肉障以炭屑用蜜捏塑成雙鳳冬月則燃於爐中先以白檀木鋪於底每至伏日取堅冰令工人鏤為鳳獸之形或飾以金銀絲帶置之雕盤中令送與王公大臣

開天遺事

楊國忠既遙領劍南每十月帝幸華清宮五宅車騎皆從家別為隊隊一色俄五家隊合爛若萬花川谷成錦

國忠導以劔南旌節遺鈿墮烏狼藉于道香聞數十里

貴妃
外傳

明皇時楊國忠賜第京師其子弟春時移名花植木檻

中下設輪脚輓以絲絙所至自隨號移春檻

花寮
小史

王維居輞川宅宇既廣山林亦遠而性好溫潔地不容
浮塵日有十數掃除者使兩童專掌縛帚而有時不給

洛陽
要記

王維為尚書右丞於藍田南輞口置別業引輞水激流

於草堂之下漲深潭於竹中浮輕舟遶溪洞彈琴朗詠
嘗飯十數名僧以玄談為樂室中惟有茶鐺藥臼經案
繩床而已維退朝之後嘗焚香獨坐三十年孤居一室

便絕塵累

冊府
元龜

學士許慎遜放曠不拘小節多與親友結宴於花園中
未嘗具帷幄設坐具使僮僕輩聚落花鋪於坐下慎遜
曰吾自有花衲何消坐具

開天
遺事

唐宮中每至秋時妃妾以金籠閉蟋蟀實枕函畔夜聽

其聲長安庶民之家皆效之

開天遺事

闌蛩之戲始於天寶間長安富人鏤象牙為籠而畜之

萬金之資付之一喙

負喧雜錄

唐人遊賞曲江莫盛於中和上巳節故杜少陵有麗人

行

事文類聚

曲江池本秦時隄州唐開元中疏鑿為勝境南即紫雲樓芙蓉苑西即杏園慈恩寺花卉環周烟水明媚都人遊賞盛於中和上巳節即錫宴臣寮會於山亭賜太常

教坊樂池備綵舟唯宰相三使北省官翰林學士預焉

傾動皇州以為盛觀

松憲雜記

長安每歲諸陵寒食薦餠粥雞毬等又薦雷子車至清明尚食內園官小兒於殿前鑽火先得火者進上賜絹三疋金碗一口都人並在延興門看內人出城灑掃車馬喧闐新進士則於月燈閣置打毬之宴或賜宰臣以下醑釀酒即重釀酒也

輦下歲時記

曲江大會先牒教坊請奏上御紫雲樓垂簾觀焉時或

擬作樂則為之移日勅下後人置皮袋例以圖障酒器

錢帛入其中逢花即飲

曲江春遊錄

右教坊在光宅坊左教坊在延政坊右多善歌左多工

舞

教坊記

唐進士杏花園初會謂之探花宴擇少俊二人為探花

使徧遊名園若他人先折得花二人皆受罰

言撫

韋綬為集賢院學士九月九宴羣臣曲江綬請集賢院

學士得別一會帝從之

唐書韋綬傳

長安進士鄭愚劉參等十數輩每春時選妓三五人乘小
犢車詣名園曲沼藉草裸形去其巾帽呌笑喧呼謂之

顛飲

開天
遺事

長安富家子劉逸李開衛曠家世巨豪而好接待四方
之士每暑伏中各於林亭內植畫柱以錦綺結為涼棚
設坐具召長安名妓間坐遞相延請為避暑之會時人

無不愛羨

開天
遺事

長安有平康坊妓女所居之地京都俠少萃集於此兼

每年新進士以紅箋名紙遊謁其中時人謂此坊為風

流藪澤

開天遺事

曲江池入夏則菰蒲葱翠柳陰四合碧波紅蕖湛然可

愛好事者賞芳辰玩清景聯騎攜觴疊疊不絕

劇談錄

長安自昭應縣至都門官道左右村店民當大路市酒
量錢數多少飲之亦有好施者與行人解乏號為歇馬

杯

開天遺事

長安貴家子弟每至春時遊宴供帳於園圃中隨行載

以油幕或遇陰雨以幕覆之盡歡而歸

開天遺事

曲江貴家遊賞則剪百花裝成師子互相送遺師有小
連環欲送則以蜀錦流蘇牽之唱曰春光且莫去留與

醉人看

曲江春宴錄

霍定與友生遊曲江以千金求人竊貴侯亭榭中蘭花
挿帽兼自持往綺羅叢中賣之士女爭買拋擲金錢

曲江

春宴錄

長安富民王元寶楊崇義郭萬金等國中巨豪也各以

延納四方多士競於供送每科場文士集於數家時人目之為豪友元寶每至冬月大雪之際令僕夫自本家坊巷口掃雪為逕路躬親立於坊巷前迎揖賓客就本家具酒炙宴樂之為暖寒之會又嘗以金銀疊為屋壁上以紅泥泥之於宅中置一禮賢堂以沉檀為軒檻以磁硃甃地面以錦文石為柱礎又以銅線穿錢於後園花徑中貴其泥雨不滑也常於寢帳床前雕矮童二人捧七寶博山爐自煇焚香徹曉其驕貴如此

開天遺事王元

寶起高閣以銀鏤三稜屏風代籬落密置香槽自花鏤

中出號舍薰閣

清異錄

負半千莊在焦戴川北枕白鹿原蓮塘竹逕醪醕架海棠洞會景堂花塢藥畦碾磨麻稻諺曰上有天堂下有

負莊

樹萱錄

唐京省入伏假三日一開印公卿近郭皆有園池以至樊杜數十里間泉石占勝布滿川陸至今基地尚在省寺皆有山池曲江各置船舫以擬歲時遊賞諸司農寺

山池為最船惟戶部為最

畫境錄

逸人王休居太白山每至冬時取溪水敲其精瑩者煮

建茗共客飲之

開天遺事

大厯中張紅紅與其父歌於衢路丐食過將軍韋青所
居青聞其喉音寥亮即納為姬有樂工自撰歌即古長
命西河女也加減節奏頗有新聲侑歌於青青召紅紅
於屏風後聽之歌罷青入問紅紅如何云已得矣青出
云有女弟子久會歌此非新曲也即令隔屏風歌之一

聲不失樂工大驚異遂請相見欽伏不已尋達上聽翊

日召入宜春院

樂府
雜錄

唐尹氏女性識敏慧善歌因重陽與羣女戲登南山文
峰同輩命之歌乃顰眉緩頰怡然一曲聲達數十里故
耆舊云尹氏之歌聞於長安

野史

德宗非時召拜吳湊為京兆尹便令赴上湊疾驅諸客
至府已列筵矣或問曰何速吏曰兩市日有禮席舉鐺
釜而取之故三五百人饌常可立辦

國史
補

唐貞元中有乞者解如海其手自墮足自脛而脫善擊毬樗蒲戲又善劍舞丹九挾二妻生子數人至元和末猶在長安戲場中日集數千人觀之

獨異志

舊史稱杜佑城南樊川有桂林亭卉木幽邃佑日與公卿宴集其間元和七年佑以太保致仕居此牧之之賦亦曰予之思歸兮走杜陵之西道巖曲泉深地平木老

隴雲秦樹風高霜早周臺漢園斜陽衰草

遊城南注

崔斯立為藍田縣丞庭有老槐四行南牆鉅竹千挺水

漣漣循除鳴斯立痛掃溉對樹二松日哦其間

韓愈藍田縣丞

廳筆

記

長安貴遊尚牡丹三十餘年矣每春莫車馬若狂以不就翫為耻元和末韓令公至長安私第有之遽命斲去

曰吾豈效兒女也

國史補

唐柳宗元與劉禹錫同年及第題名於慈恩塔談元茂秉筆慈恩題名起自張莒本於寺中間遊而題其同年人因為故事

豪話錄

唐雁塔題名石刻凡留題姓名僧道

士庶前後不一非止新進士也

鼠璞

文宗太和九年二月發神策軍一千五百人脩掏曲江如諸司有力要于曲江置亭館者給與閒地七月勅造紫雲樓綵霞亭於曲江芙蓉園北上好為詩每誦杜甫曲江行云江頭宮殿鎖千門細柳新蒲為誰綠乃知天寶以前曲江四岸皆有行宮臺殿有司解署思復昇平故事故為樓殿以壯之

舊紀
會要

文宗朝有內人鄭中丞善胡琴

中丞即
宮官也

內庫二琵琶號

大小忽雷鄭嘗彈小忽雷偶以匙頭脫送崇仁坊南趙家脩理時梁厚本有別墅在昭應西臨河岸忽見一物浮過長五六尺許上以錦綺纏之令家僮接得即秘器也發視乃一女郎粧飾儼然以羅領巾繫其頸解領巾伺之口鼻有餘息即移入室中經旬乃能言云是內弟子鄭中丞昨以忤旨縊殺投於河中遂垂泣感謝厚本即納為妻因言其藝及所彈琵琶今在南趙家厚本賂樂匠購得之每至夜分方敢輕彈後遇良夜飲於花下

酒酣不覺朗彈數曲洎有黃門放鷄子私於墻下聽之
曰此鄭中丞琵琶聲也翌日達上聽文宗方追悔至是
驚喜即命宣召乃赦厚本罪仍加錫賜焉

樂府
雜錄

李德裕宅在安邑坊嘗邀朝士宴語時畏景赫曦及列
坐間樽煩暑都盡良久覺清飈爽氣凜若高秋及出戶
則烈日焦灼問之此日以金盆貯水漬白龍皮置於座

末

劇談
錄

大中元年正月敕自今放進士榜後杏園任依舊宴集

所司不得禁制

冊府元龜

咸通中同昌公主大會韋氏族於廣化里暑氣將盛公主命取澄水帛以水醺之掛於南軒良久滿座皆思挾續澄水帛長八九尺似布而細明薄可見其中有龍涎故能消暑也韋氏諸家好為葉子戲夜則公主以紅琉璃盛夜光珠捧立堂中光明如晝焉公主有疾召術士米實為法燈乃以香蠟燭遺之燭方二寸上被五色文卷而薰之竟夕不盡郁烈之氣可聞於百步餘烟出其上

即成樓閣殿臺之狀或云蠟中有蜃脂故也

杜陽新編

乾符四年新進士曲江春燕有溫定者久困場籍坦率自恣至其日蒙衣肩輿金翠之飾復出於衆侍婢皆稱是徘徊於柳陰之下俄頃諸公自露棚移樂登鷁首既而謂是豪貴其中姝麗必矣因遣促舟而進莫不注視或肆調謔定乃於簾間垂足膝脰極偉而長毳衆忽覩之皆掩袂迴舟避之或曰此必溫定也

燕言

京輦自黃巢退後脩葺殘毀時定州王氏俗號王酒胡

居於上都巨富納錢三十萬貫助脩朱雀門僖宗詔令
重脩安國寺畢親降車輦乃扣新鐘十撞捨錢一萬貫
曰有能捨一千貫者即撻一槌王酒胡選上鐘樓連打
一百下便於西市運錢十萬入寺

中朝
故事

宋真宗祀汾陰還駐蹕華陰因登亭望蓮花峰忽憶种
放居是山亟令中貴人裴愈召之時放稱疾不應召上
笑而止因問愈曰放在家何為愈對曰臣到放所居時
會放在草廳中看畫水牛二軸上顧謂侍臣曰此高尚

之士也

畫圖見聞志

王元沖欲登蓮花峰約寺僧到峰頂當起烟為信翌日僧候至午果有烟起留二旬乃下僧問之云峰頂有池菖菡盛開可愛其中又有破鐵舟焉

山樓志

嘉祐九年蘇軾遊盤屋南溪醉後解衣濯足因咏韓公

山石之篇忘其在百里之外

盤屋縣志

又盤屋有玉女洞飛

泉甘冽蘇子瞻過此汲兩瓶去恐後復取為從者所紿乃破竹作券使寺僧藏之以為往來之信戲曰調水符

蕉書

呂大忠大臨嘉祐間因汲公為澄城令相與至縣尋春
匱谷酌情公泉題名石壁至今為邑人所重

同州志

華陰楊褒好古博物家雖貧尤好書畫竒玩家姬數人
布裙糲食而歌舞絕妙

燕談錄

池陽楊爾恪庵居疏食不與世相聞吟咏之外略無餘

事

遺聞錄

石安蕭弘略好讀書暇則灌園治蔬嘯咏渭上性孝友

每愛誦兄弟同居忍便安之詩以風鄉里

遺聞錄

康德涵王敬夫同里同居同放逐汧東郭杜之間相與
過從談讌徵歌以相娛樂敬夫將填詞以厚貲募國工
杜門學按琵琶三絃習諸曲盡其技而後出之德涵尤
妙於歌彈酒酣搗彈按歌更起為壽老樂工擊節自謂

弗如

列朝詩集

語林

齊景公問孔子曰昔秦穆公國小處僻其霸何也對曰

秦國雖小其志大處雖僻行中正身舉五穀爵之大夫
起累紲之中與語三日授之政以此取士雖王可也其

霸小矣

孔子
家語

羊客問子思曰古之帝王中分天下使二公治之謂之
二伯周自后稷封為王者後子孫據國至太王王季文
王此固為諸侯矣焉得為西伯乎子思曰吾聞諸子夏
殷王帝乙之時王季以功九命作伯受珪璜鉅鬯之賜
故文王因之得專征伐此以諸侯為伯猶周召之以君

為伯也

子孔叢

樗里子多智號智囊諺曰力則任鄙智則樗里

水經注

楚國龔舍初隨楚王朝宿未央宮見赤蜘蛛四面縈羅網有蟲觸之退而不能出舍乃嘆曰吾生亦如是耳仕宦人之羅網也豈可淹歲於是掛冠而退

金樓子

史記渭川千畝竹其人與萬戶侯等李頎望秦川詩秋

聲萬戶竹正用此意

全唐詩話

樓護谷永俱為五侯上客長安號云谷子雲筆札樓君

卿喉舌

西京雜記

蔣栩歸杜陵荆棘塞門終身不出時人謗曰楚國二龔

不如杜陵蔣翁

嵇康高士傳

關東鄙語云人聞長安樂出門向西笑

侯鯖錄

成帝時王吉為京兆尹先是京兆有趙廣漢張敞王章

王尊至駿皆有能名故京師稱曰前有趙張後有三王

漢書王吉傳

楊震明經博覽無不窮究諸儒為之語曰關西孔子楊

伯起

東觀漢紀

更始葬霸陵更始尚書僕射鮑永歸世祖累遷司隸校尉行縣經更始墓遂下拜哭盡哀而去帝問公卿大中大夫張湛曰仁者行之宗忠者義之主也仁不遺舊忠不忘君行之高者帝乃釋

水經注

馬援轉遊隴漢間常謂賓客曰丈夫為志窮當益堅老

當益壯因處田處牧至有牛馬羊數千頭穀萬斛

冊府元龜

杜林字伯山與馬援同鄉里素相親厚援從南方還林

馬適死援令子持馬一匹遺林曰朋友有車馬之饋可具以脩之林受之居數月林遣子奉書曰將軍內施九族外有賓客望恩者多林父子兩人食列卿祿嘗有盈今送錢五萬援受之謂子曰人當以此為法是杜伯山所以勝我也林位司空

冊府元龜

馬援為人明皙鬚髮眉目如畫閑於進退尤善述前事每言及三輔長者至閭里少年皆可觀聽皇太子諸王聞者莫不屬耳忘倦

冊府元龜

趙岐娶扶風馬敦女宗姜敦兄子融外戚豪家岐嘗鄙之與其友書曰馬季常雖有名當世而不持士節三輔高士未曾以衣裾拂其門

冊府元龜

趙溫子柔為京兆郡丞歎曰大丈夫當為雄飛焉能雌

伏遂棄官而去

東觀漢記

張湛為左馮翊後告歸平陵望寺門而步主簿進曰明府位尊德重不宜自輕湛曰禮下公門式路馬孔子于鄉黨恂恂如也父母之國所宜盡禮何謂輕哉

冊府元龜

陳遵張竦俱免官歸長安遵嘗謂竦曰足下諷誦經書
苦身自約不敢差跌而我故意自恣浮湛俗間官爵功
名不減於子而差獨樂顧不優耶竦曰人各有性長短
自裁子欲為我亦不能吾而效子亦敗矣雖然學我者
易持效子者難將吾常道也

漢書游
俠傳

樂廣少與弘農楊準相善準之二子曰喬曰髦皆知名
於世準使先詣裴頠頠性弘方愛喬有高韻謂準曰喬
當及卿髦少減也又使詣廣廣性清淳愛髦有神檢謂

準曰喬自及卿然髦亦清出準笑曰我二兒之優劣乃

裴樂之優劣也

晉書樂廣傳

韋夔高尚不仕時兄孝寬為延州總管夔至州與孝寬相見將還孝寬以所乘馬及轡勒與夔夔笑謂孝寬曰昔人不棄遺簪墜履者惡與之同出不與同歸吾之捺行雖不逮前烈然捨舊錄新亦非吾志也乃乘舊馬以

歸

冊府元龜

摯瞻曾作四郡太守大將軍戶曹叅軍復出作內史

摯氏

世本曰瞻京兆人父育涼州刺史瞻善屬文起家著作郎中朝亂依王敦為戶曹參軍歷安豐新蔡西陽太守

年始二十九嘗別王敦敦謂瞻曰卿年未三十已為萬石亦太蚤瞻曰方於將軍少為太蚤比之甘羅已為太

老

世說新語

韋誕書如龍威虎振劍拔弩張張伯英書如漢武帝愛

道馮虛欲仙

袁昂古
今書評

李固歷位度支尚書太和二十一年孝文幸長安問以咸陽山河險固秦漢舊都勸帝去洛陽都之後孝文引

見同笑謂曰昔婁敬一說漢祖即日西駕尚書以西京
說朕不廢東轅當是獻可理殊所以今古相反同曰昔
漢祖起於布衣欲藉險自固婁敬之言符於本旨今陛
下德洽四海事同隆周是以愚臣獻說不能上動帝大

悅

北史李
順傳

范柏年漢中人嘗見宋明帝言及廣州貪泉曰梁州中
惟有文川武鄉廉泉讓水帝問卿宅何在曰臣所居廉

讓之間

南史胡
諧之傳

楊惓小名秦王華陰人幼喪母詣舅源子恭子恭問讀何書曰誦詩子恭曰誦至涓陽未邪惓便號泣感噎子恭亦對之歔歔子恭後謂惓父津曰嘗謂秦王不甚察慧從今已後更欲刮目視之

冊府元龜

文中子之韓城自龍門關先濟賈瓊程元後關吏仇璋止之曰先濟者為誰吾視其顙顙如也重而不亢目燦如也澈而不瞬口敦如也闕而不張鳳頸龜背鬚垂至腰參如也與之行俯然而色卑與之言泛然而後應浪

驚施旋而不懼是必有異人者也程元曰子知人矣是王通者也賈瓊曰吾二人師之而不能去也仇璋曰夫杖一德乘五常扶三才控六藝吾安得後而不往哉遂捨職從於韓城

中說

字文化及右翊衛大將軍述之子也好乘肥挾彈馳騫道中長安謂之輕薄公子

冊府元龜

馬三寶奉平陽公主遁於司竹及義兵濟河以衆數萬詣軍後領平道軍將嘗從幸司竹帝顧謂三寶曰是汝

建英雄處耶衛青大不惡

冊府元龜

蕭瑀陳叔達於龍昌寺看李花相與論李有九標謂香

雅細淡潔密宜夜月宜綠鬢宜泛酒

承平舊纂

尉遲敬德為鄜州都督上謂敬德曰朕欲以女妻卿何如敬德謝曰臣雖不學聞古人富不易妻此非臣所願

也

綱鑑補

上嘗語及關中山東人意有同異殿中侍御史張行成曰天子以四海為家今有東西之異示人以隘上善其

言厚賜之

太宗實錄

楊炯華陰人以文辭知名海內稱為王楊盧駱亦號四

傑炯曰吾愧在盧前耻居王後

唐書文藝傳

張說謂人曰楊

盈川之文如懸河注水酌之不竭既優於盧亦不減王

耻居王後則信然愧在盧前則為謙矣

唐新語

劉迅字捷卿歷京兆功曹叅軍事迅寢疾房琯聞憂不寐曰捷卿有不諱天理欺矣陳郡殷寅名知人見迅歎曰今黃叔度也劉晏每聞其論曰皇王之論盡矣上元

中避地安康卒

隋唐嘉話

渭南尉劉延祐弱冠政事為畿縣最李勣謂曰足下春

秋甫爾遽擅大名宜稍自貶抑無為獨出人右也

鴻書

潘師正居逍遙谷高宗問所須對曰茂松清泉臣所願

也

事文類聚

田游巖入太白山高宗幸其門謂曰先生此中佳否答

曰臣所謂泉石膏肓煙霞痼疾

事文類聚

太平公主選薛曜之子紹尚焉紹兄顓以公主寵盛深

憂之族祖戶部郎中克構曰帝甥尚主國家故事苟以恭慎行之亦何傷然諺曰娶婦得公主無事取官府不得不為之懼也

通鑑

竇從一為雍州刺史諂附權貴太平公主與寺僧爭碾磴雍州司戶李元紘判歸寺僧從一懼命元紘改判元紘大書判後曰南山可移此判無動

通鑑

長壽二年裴子餘為鄠縣尉同列李隱朝程行謏皆以文法著稱子餘獨以詞學知名或問雍州長史陳崇業

三人優劣孰先崇業曰譬之春蘭秋菊俱不可廢

嘉話錄

宋璟與蘇瓌子頴同時為相頴除紫薇侍郎平章事時
璟歎曰吾與蘇家父子同時為相至於寬厚博物僕射
亦有之若正直賢明則頴過其父推此而論繼代為相
有之如頴與其父同秉衡者古無所聞璟初與其父
比肩又與其子同列如璟年高德重久居台位又無其

比

卓異記

宋清賣藥於長安市人有急難傾財救之長安言人有

義聲賣藥宋清

唐國史補

陸象先為同州刺史有家僮遇參軍不下馬參軍欲賈其事鞭背見血曰卑吏犯公請去究公謂曰奴見官人不下馬打也得不打也得官人打了去也得不去也得參軍不測而退

國史補

太液池岸有竹數十叢牙筍未嘗相離密密如栽帝呼

之為義竹

開天遺事

唐張彖為華陰尉歎曰丈夫有凌雲蓋世之志拘於下

位若立身於矮屋中使人擡頭不得遂拂衣長往

鴻書

唐盧藏用始隱於終南山中宗朝累居要職道士司馬承禎睿宗朝至京將還藏用指終南山謂之曰此中大
有佳景處何必遠承禎徐答曰以僕所觀乃仕宦捷徑

藏用有慚色

唐新語

郭令公出見脩宅者謂曰好築此牆勿令不牢築者釋

錘對曰數十年來京城達官牆皆是某所築祇見人自

改換牆今見存令公聞之愴然動心

封氏見聞錄

憲宗久親政事忽問京兆尹幾員李相吉甫對曰京兆

尹三員一員大尹二員少尹以為善對

國史補

憲宗時裴均為相嘗有故人自遠詣之均資給優厚從

容欸狎其人乘間求京兆判司均曰公才不稱此官不

敢以故人之私傷朝廷至公

唐書裴均傳

左軍中衛吐突承璀盛修安國寺奏立聖德碑先構碑

樓請勅學士撰文且言臣已具錢萬緡欲酬之上命李

絳為之絳言堯舜禹湯未嘗立碑自言聖德惟秦始皇

於巡遊所遇刻石高自稱述未審陛下欲何所法上命

曳倒碑樓

通鑑

李華含元殿賦初成蕭穎士見之曰景福之上靈光之

下

唐國史補

韋蘇州如園客獨繭暗合徽音杜牧之如銅丸走坂駿

馬注坡白樂天如山東父老課農桑言言事事皆著實

救陶孫詩評

天街兩畔槐樹俗號為槐衙曲江池畔多柳亦號為柳

衙意謂其成行列如排衙也

中朝故事

李白登華山落雁峰曰此處呼吸之氣想通帝座恨不

攜謝朓驚人詩來搔首問青天耳

山居雜錄

聖歷二年吏部侍郎鄭果注韓思復為太常博士元希

聲京兆士曹嘗謂人曰今年掌選得韓元二子吏部不

負朝廷矣

唐會要

盧思道常曉醉於省門見從姪賁賁曰阿父何處飲來

凌晨嵬我思道曰長安酒二百價不嵬我何嵬我

談藪

裴晉公午橋在小兒坡茂草盈里晉公每使數白羊散

於坡上曰芳草無情賴此粧點

窮幽記

裴度臨終告門人曰吾死無所繫但午橋莊松雪嶺未

成軟碧池中魚尾未長漢書未終為可恨耳

春雪箋

明道在鄆縣政聲流聞當路欲薦之朝而問其所欲對

曰夫薦士者皆視才之所堪不問志之所欲

伊洛書

張詠少時謁華山陳圖南遂欲隱居陳曰公方有官職

未可議此其勢如失火家待君救火豈可不赴

宋名臣言行錄

邵伯恭侍郎守長安既去以書抵親識曰自去長安唯

酥梨笋時復在念

過庭錄

韓琦范仲淹在兵間久名重一時號令嚴明愛撫士卒
諸羗來者推誠撫接咸感恩威邊上謠曰軍中有一韓
西賊聞之心膽寒軍中有一范西賊聞之驚破膽天下

稱爲韓范

綱鑑補

元豐庚申歲予行至雍華間關西學者相從者六七人
予以千錢掛馬鞍比就舍則亡矣僕夫曰非晨裝而忘

之則涉水而墜之矣予不覺嗟曰千錢可惜坐中一人者曰水中囊中可以一視人亡人得又何嘆乎予曰人得之乃非亡也吾嘆乎有用之物若沉水中則不復為用矣至雍以語與叔與叔曰誠善矣然觀先生之言則見其有體而無用也予因書而識之

遺金
閩志

曲端吳玠建炎間有重名於陝西西人為之語曰有文有武是曲大有謀有勇是吳大

筆記

王端毅怒歷仕四十五年凡上三千餘疏皆忠直剴切

蓋憂世之志如范希文濟世之才如司馬君實直諫如

汲長孺惠愛如鄭子產

劉昌隱
荀瓚撰

張潛華州人生而穎秀長益自負不凡弘治壬子邃菴

楊公督學閩中徧試諸生謂閩中有三才子蓋慶陽李

獻吉洵陽張光世其一公也其年秋三人同舉而獻吉

發解云

漢坡
續集

長安諸生馮仲好為第一仲好瘠則甚矣而文氣雄萬

夫余嘗登太華之山削成而四方其山骨立草木不蕃

然蔽虧日月吐納風雲中原萬里可俯而窺仲好之人

與文將無似之

大沁山
房集

三原王康僖公講學其父端毅公督之朝邑韓苑洛講
學其父蓮峰老人督之康僖公之門人為馬谿田苑洛
之門人為楊斛山當其時家庭之間藹若洙泗師弟之
際不愧伊洛此吾鄉前輩所以為盛

馮少墟
疑思錄

王端毅之事功楊斛山之節義呂涇野之理學李空同
之文章足稱國朝閫中四絕

馮少墟池
陽語錄

明耀州胡茂却客讀書作天上曲一百首藏於家予得之有云天風颭颭吹鳳毛華蓋前頭引翠旄暫憇崑崙寬眼界居然五岳似秋毫讀之可以想其蕭散不羣之

致遺聞錄

王敬夫如狐禪鹿仙亦自縱橫王允寧如下邑工琢玉器非不奇貴痕跡宛然又如王子師學華相國在形迹間所以愈遠許伯誠如通津郵資用本少供億不虛喬景叔如江東秀才文弱都雅而氣不壯

王鳳洲文評

王敬夫如漢武求仙欲根正染時復遇之終非實境康
德涵如靖康中宰相非不處貴恒擾粗率無大處分馬
仲房如衛尉屯西宮斥堠精嚴甲仗雄整而士乏樂用
之氣王舜夫如敗鐵網取珊瑚用力堅深得寶自少孫
太初如雪夜偏師間道入蔡又如鳴蜩伏蚓聲振月露
體滯泥壤喬景叔如清泉放溜新月掛樹然此景殊少
不耐縱觀許伯誠如賈胡子作獨遊隨事揮散無論中
節王允寧如馬服子陳師自作奇正不得兵法又如項

王嘔嘔未了忽發暗鳴

王鳳洲
詩評



陝西通志卷九十八